


新鄭縣志

125
79
1102
319654
1776
V. 6

V. 6



新鄭縣志卷之十六目錄

人物志四 列傳

明

邵進

劉槃

時省

高魁

史載德

楊同

高尚賢

高捷

高拱

高才

高揀

薛懷奇

王良臣

劉紹芳

高務實

高務觀

李穎

劉倚勃

秦毓秀

秦毓慶

高瑞雛

高櫪

劉孟奇

高家

高家

高家

李

李

李

王

王

王

高

高

高

史

史

史

高

高

高

人

族

卷之十六

新鄭縣志卷之十六

人物志四 列傳

明

邵進邑人孝廉溫之子正統辛酉舉于鄉壬戌成進士由縣令報最徵拜監察御史抗章言事風裁凜然紀綱爲之一振尋陞陝西苑馬寺卿居職勤慎以政績著聞進善爲詩文尤長于集句嘗集唐詩成絕句數百首天然湊泊了無痕迹傳誦幾徧海內上元黃九烟周星畸人也生平多否少可獨于進所著集句爲贊賞不容口

云 見列卿記補

劉槃字克昌昌樂令源之子中明正統丁卯鄉試天順丁丑進士初

授直隸宿州牧其治宿也持大體崇實政與民休息宿人德之牧
宿六年擢守寧國府治寧如治宿九年秩滿當遷會權璫柄政以
一賄責樂樂憤然曰大丈夫不能自立乃倚中官以進耶且吾安所
得賄哉遂致政歸百姓留之不得爭肖像祀焉濟南陶元素贊曰
今人之相古人之德盛世循良中原豪傑歸里自號樂閑老人以
詩酒自娛纂邑志壽八十終崇祀鄉賢

見舊志

時省邑人貢生任無極縣教諭以德化人學者宗之上官廉其才以
卓異薦授御史益有聲於時累官禮科給事中未幾卒鄉人惜之

採楊同所
撰碑記補

高魁字文元慷慨有氣節兄弟同居財產盡屬之數年終無間言與

人共事遇險難則以身任成化丙午舉於鄉授金鄉令嚴明而仁厚豪右不敢撓其法而良善獲安在任六年民戴其德立生祠俎豆焉擢工部都水司主事督荊州稅時劉瑾專政無賂者輒禍及同官每縮公課賄瑾或以此見諷魁愕然曰是何爲哉公私之際忠邪之判也竟不私瑾瑾亦壯之陞虞衡司郎中監薊州鐵冶連疏乞歸居家十餘年強直一如當官時子姓或以私語相干立詞責之年七十六卒邑人彙其事上白從祀鄉賢山東名宦河南人物俱有傳載二省志中

見舊志

史載德新鄭人大同同知鼂之子宏治癸丑進士歷御史有聲父沒哀慟殊常旣葬廬墓朝夕哭奠小大之事先啟後行人稱事死如

生宏治中旌表

見何喬遠
名山藏補

楊同字一仁號坦夫長厚醇和居家以孝弟稱領明宏治己酉鄉薦任渭南縣令政寬賦平以德化民俗爲之變在渭八年劉瑾專政

歸里考終渭爲立祠鄭亦崇祀鄉賢

見舊志

高尚賢字大賓號鳳溪郎中魁子正德庚午鄉試第一丁丑成進士授工部主事監臨清磚廠以廉幹稱改禮部儀制司主事尋陞精膳司員外郎會乾清官災乃上疏曰此天意也近戚漸盛宦官漸恣傳奉漸多納諫漸難數者皆足招災言甚切至陞山東按察司僉事時礦豪鼓釁提兵擒之就改督學使父憂服闋陞陝西按察司僉事尋陞光祿寺少卿共事者多中貴用積垢相蟠結數十年

牢不可破尚賢塞源汰浮歲計稱裕而中貴亦爲之斂戢致仕歸
築室於大隗山究心理學士爭從之臺諫論薦閉門謝絕平日爲
古文詞醇雅如曾南豐晚乃曰君子之學不在是也取舊稿刪之
僅存百餘篇名鳳溪遺稿卒祀鄉賢省志人物傳載其事爲理學

名臣云

見舊志

高捷字漸卿號存菴宏治壬戌從祖宦生東國之金鄉縣修幹長髯
性剛負節俠自喜幼從父貴有以公子呼輒叱曰公子何加我父
大奇之甫壯卽勵學暇則與其友角獵於野爲文嘗恨弗勁曰將
爲萬人敵戰棘園稍頓隕目拔劍割鬚下帷嘉靖甲午舉於鄉乙
未登進士第授戶部主事督糧臨清時衛士侵冒者衆乃自唱名

給餉餘歸公帑以報大司農時大司農爲儉菴梁公中朝名臣也
不輕許可獨驚捷實心濟事居三月以祖母憂去闕授兵部職方
主事歷員外武選郎中武選典軍政凡襲替貼黃藏內府中官押
勒不便捷素強有力有心計躬理覈又手自註選選法肅清究以
剛忤堂卿竟出知兗州府兗民疲而悍一意惠窮摧強立條格以
釐豪猾獎殲郡稱神明焉宗藩橫不法處之以正而祿均給無留
難橫服巨盜李邦珍聚衆流劫捷閑武畧計散其黨兩月寇平三
載陞山西按察副使核吏治察民奸抑強植弱晉人畏而戴焉時
弟拱已在翰苑里中有托爲先容者痛懲置劣考會代州有警督
撫檄守代代兵弱捷卒至一面調兵赴代列營城外爲戰計供具

芻糧牛酒於路以待調兵以故敵聞遁去撫按疏其功曰可當大
任陟江西右叅政時倭寇江上殺官兵莫能禦天子震怒勅銓部
簡有才力任事者往廷臣會推捷僉都御史提督操江閱南兵脆
遣募北兵寇猝至留都震恐乃躬擐甲胄集商船授金鼓旗幟寇
遁斬首數百餘級諸將皆上功計簿捷不計曰吾方滅此朝食又
執賊謀者諭之曰吾不殺若若語諸寇令全倭來降公卿壯之適
所募北兵至則自督練懸金牌親勞食肉鯨吸士感奮於是威震
賊竟却留都以安當事各衙門皆欲援王陽明例擬封伯弟拱在
翰院力止之曰祖制文官不許封公侯此疏一上是違制也不可
事乃寢後有權宰嫉功畏其峭直權宰之親某與談兵事不合又

懷忌而譖諸權宰諷鄉人劾捷以北兵擾地方調曹濮兵備副使尋陞陝西右叅政時權宰怒未已會差科道勘南中事諭令廉捷無所得以前官事誣劾捷疏辯臣以某年月履任科道官劾臣事在某年月是臣未任時事牘存詔准行勘郡守郁文奎懼自盡勘者終畏權宰不爲白遂歸田坦如也命家人具布衣百領族貧來則人給一領親識遺以聚帛異母弟揀未盪母繼光祿公逝次第某嫉之揀瀕死者屢捷南旋動次第以情令均之產朝夕課舉子業爲娶後竟以成立族黨喪不能舉貧不能娶者爲捐貲財畢其婚葬以百計邑自己酉科不第恒召諸門下士諭之曰讀書不登第皆以見理未徹耳予習舉子業每一語竟日玩索好誦秦漢間

文字猶優寒五科諸賢若玩理精微好讀古文詞何難掇一科耶
日爲講解課文藝一時登第者如閩邦克毛節皆出其門性不喜
紛華教人必以矩矱青衿馮生者冠忠靖謁之責曰衣冠自有式
其人慙退明日易角巾以謝少年王生者與鄰人蔡笄女鬪鴿戲
父怒其戲也訟之官官不爲理加笞蔡忿自殺是歲夏大旱遍禱
旱益甚提曰一夫含冤足干天和此得微蔡子作厲耶盍祭之令
如其言果大雨邑人神其見以爲洞澈幽明云年荒出所儲穀數
百斛濟之全活者衆遇霪雨冰雪輒煮粥食道貧歲時伏臘喜與
諸親識飲卽繩樞之家無弗至至則啖肉呼盧大飲而去歲終納
租者至則給酒肉慰勞曰爾終歲勤苦以輸何以卒歲仍給粟以

僧一日與貴官飲談兵耳熱起入內出則披甲嬰冑舉大刀鬚四
指目光如炬聲如雷貴官恐請罪已而笑曰國家有此奇丈夫哉
奸孰敢窺伺耶其豪爽不衰如此年六十七素無疾亦不識藥物
一夕忽倦卧誠其宜人趣詔諸弟姪至曰吾居官雖久然性崛犂
爾輩所知惟俸金在可分散於是三弟拱五弟才六弟揀姪務實
暨姊妹各給金三族人並一二僕隸各有遺惠乃端坐而逝有子
曰務滋時方六歲逝之明年鄉人思之請於督學楊公俊民入祀

鄉賢

見舊志

高拱字肅卿新鄭人嘉靖二十年進士選庶吉士踰年授編修
居裕邸出閣講讀拱與檢討陳以勤並爲侍講世宗諱言立太子

而景王未之國中外交疑拱侍裕邸九年啟王益敦孝謹敷陳剴切王甚重之手書懷賢堂具字賜焉累遷侍講學士嚴嵩徐階遞當國以拱他日當得重薦之世宗拜太常卿掌國子監祭酒事四十年擢禮部左侍郎尋改吏部兼學士掌詹事府事進禮部尚書召入直廬撰齋詞賜飛魚服四十五年拜文淵閣大學士與郭樸同入閣拱與樸皆階所薦也世宗居西苑閣臣直廬在苑中拱未有子移家近直廬時竊出一日帝不豫誤傳非常拱遽移具出始階甚親拱引入直拱驟貴負氣頗忤階給事中胡應嘉階鄉人也以劾拱姻親自危且瞞階方與拱卻遂劾拱不守直廬移器用於外世宗病亟勿省也拱疑應嘉受階指大憾之穆宗卽位進少

保兼太子太保階雖爲首輔而拱自以帝舊臣數與之抗樸復助之階漸不能堪而是時以勤與張居正皆入閣居正亦待裕邸講階草遺詔獨與居正計拱心彌不平會議登極賞軍及請上裁去留大臣事階悉不從拱議嫌益深應嘉掌吏科佐部院考察事將竣忽有所論救帝責其牴牾下閣臣議罰樸奮然曰應嘉無人臣禮當編氓階旁睨拱見方怒勉從之言路謂拱以私怨逐應嘉交章劾之給事中歐陽一敬劾拱尤力階於拱辯疏擬旨慰留而不甚譴言者拱益怒相與忿詆閣中御史齊康爲拱劾階康坐黜於是言路論拱者無虛日南京科道至拾遺及之拱不自安乞歸遂以少傅兼太子太傅尚書大學士養病去隆慶元年五月也拱

以舊學蒙眷注性強直自遂頗快恩怨卒不安其位去旣而懷
乞歸三年冬帝召拱以大學士兼掌吏部事拱乃盡反階所爲凡
先朝得罪諸臣以遺詔錄用贈卹者一切報罷且上疏極論之曰
明倫大典頒示已久今議事之臣假託詔旨凡議禮得罪者悉從
褒顯將使獻皇在廟之靈何以爲享先帝在天之靈何以爲心而
陛下歲時入廟亦何以對越二聖臣以爲未可帝深然之法司坐
方士王金等子弑父律拱復上疏曰人君隕於非命不得正終其
名至不美先帝臨御四十五載得歲六十有餘末年抱病經歲上
賓壽考令終曾無暴遽今謂先帝爲王金所害誣以不得正終天
下後世視先帝爲何如主乞下法司改議帝復然拱言命減戍拱

之再出專與階修郤所論皆欲以中階重其罪賴帝仁柔弗之竟也階子弟頗橫鄉里拱以前知府蔡國熙爲監司簿錄其諸子皆編戍所以扼階者無不至逮拱去位乃得解拱練習政體資經濟才所建白皆可行其在吏部欲遍識人才授諸司以籍使署賢否誌爵里姓氏月要而歲會之倉卒舉用皆得其人又以時方邊事請增置兵部侍郎以儲總督之選由侍郎而總督由總督而本兵中外更番邊材自裕又以兵者專門之學非素習不可應卒儲養本兵當自兵部司屬始宜慎選司屬俟得謀才力時舉而用者久而任之勿遷他曹他日邊方兵使督撫之職皆於司屬中各取邊地之人以備司屬如銓司分省故事則題覆情形司屬詳

格并重其賞罰以鼓勵之凡邊地有司其責頗重不宜付雜流及
遷謫者皆報可著爲令拱又奏請科貢與進士並用勿循資格其
在部考察多所參伍不盡憑文書爲黜陟亦不拘人數多寡黜者
必告以故使衆咸服古田猺賊亂用殷正茂總督兩廣曰是雖貪
可以集事貴州撫臣奏土司安國亨將叛命阮文中代爲巡撫臨
行語之曰國亨必不叛若往無激變也旣而如其言以廣東有司
多貪黷特請旌廉能知府侯必登以厲其餘又言馬政鹽政之官
名爲卿爲使而實以閒局視之失人廢事漸不可訓惟教官驛遞
諸司職卑祿薄遠道爲難宜銓注近地以恤其私詔皆從之拱所
經畫皆此類也俺答孫把漢那吉來降總督王崇古受之請於朝

乞授以官朝議多以爲不可拱與居正力主之遂排衆議請於上而封貢以成事具崇古傳進拱少師兼太子太師尚書大學士改建極殿拱以邊境稍寧恐將士惰玩復請敕邊臣及時閒暇嚴爲整頓仍時遣大臣閱視帝皆從之遼東奏捷進在國中極殿大學士尋考察科道拱請與都察院同事時大學士趙貞吉掌都察院持議稍異同給事中韓楫劾貞吉有所私庇貞吉疑拱嫉之遂抗章劾拱拱亦疏辨帝不直貞吉令致仕去拱旣逐貞吉專橫益著尚寶卿劉奮庸上疏陰斥之給事中曹大埜疏劾其不忠十事皆謫外任拱初持清操後其門生親串頗以賄聞致物議帝終眷拱不衰也始拱爲祭酒居正爲司業相友善拱亟稱居正才及是李春

芳陳以勤皆去拱爲首輔居正肩隨之拱性直而傲同官殷士儋
輩不能堪居正獨退然下之拱不之察也馮保者中人性黠次當
掌司禮監拱薦陳洪及孟冲帝從之保以是怨拱而居正與保深
相結六年春帝得疾大漸召拱與居正高儀受顧命而崩初帝意
專屬閣臣而中官矯遺詔命與馮保共事神宗卽位拱以至上幼
冲懲中官專政條奏請詘司禮權還之內閣又命給事中雒遵程
文合疏攻保而已從中擬旨逐之拱使人報居正居正陽諾之而
私以語保保訴於太后謂拱擅權不可容太后額之明日召羣臣
入宣兩宮及帝詔拱意必逐保也急趨入比宣詔則數拱罪而逐
之拱伏地不能起居正掖之出僦驢車出宣武門居正乃與儀請

留拱弗許請得乘傳許之拱既去保憾未釋復搆王大臣獄欲連
及拱已而得寢居家數年卒居正請復其官與祭塋如例中旨給
半塋祭文仍寓貶詞云久之廷議論拱功贈太師諡文襄廕嗣子
務觀爲尚寶丞

錄明史
本傳

高才字德卿文襄公拱之弟也幼英敏日誦數千言既長於書無所
不讀以禮經舉於鄉時典南宮者多兄門下士才引嫌不與試後
任都督府都事遷經歷御衆寬和軍民咸頌爲惠人嘗以新鄭爲
六省孔道驛遞遼遠邑人疲于奔命請諸文襄具題復設郭店一
驛至今往來捷便道路無疲斃憂者皆其力也致仕歸築室樊宮
之側號曰梅庵杜門却掃唯日與門人探討經史恂恂一老布衣

然年饑爲粥于路全活甚多遇瘟疫大行則施藥以濟病者晚年

纂修邑志卓然成一家言鄉人至今稱之

見家
乘補

高棟字競菴少卿尚賢第六子時兩河典試多兄門下士避嫌不與
秋間萬歷間僅以明經謁選布衣蔬食恭謹平恕其天性也至輸
學田補學基鑿泮池建文昌閣歲饑賑粟疫行施槥資助婚娶又
如兌軍折布甦絕民累雖累費金錢畧無吝色及赴廷試卷列上
等授鳳陽府判鳳郡完鈔舊多濫索棟按日放闌平收稅銀商賈
悅之有樂戶買良爲娼者痛懲之追還男女惡俗永息比署壽州
四境晏如正陽之民倚爲父母病草屬其使曰吾篋中無剩物所
餘六十金爲我治歛具吾家世守清白爾告我子若孫勿變家法

也比卒百姓皆垂涕正陽爲祠祀之里人請入鄉賢

見舊志

薛懷竒河南新鄭人隆慶間以貢任交城訓導醇雅不縈情勢利與人接歡然終日喜怒不形諸生私相慶如在光風霽月等爲權相

中傷去祀名宦

見山西通志補

王良臣字敬吾萬歷甲午孝廉任陽城縣知縣晉俗止知稼穡不知樹木良臣課民種柿每戶規以十數初有難色後值歲歉賴以存

活甚衆陞河間府同知壽終從祀鄉賢

見舊志

劉紹芳字振寰槃孫也中萬歷己酉鄉科任山東鄒平縣令邑有兌軍一役民甚苦之紹率衆上陳積累得革先有勢家圖人田不遂誣以殺人獄成未決紹芳下車卽爲伸雪咸服其神明及解組歸

里爲善不倦壽八十一歲終子於鼎武英殿中書

見舊志

高務實字曙陽鳳陽判揀之冢嗣少師文襄之猶子也萬歷間以諸生授武英殿中書性篤孝生事塋祭盡志盡禮居官廿餘年忠誠自矢泊家居同里王氏有殺婦之誣務實爲辯明之又有晉人邢守禮客居于鄭隆冬被盜裸體將殆解衣力救得甦晚善養生八十猶健易簣前三日見一道士敘述往因人以是知其根器不凡

云

見舊志

高務觀字象元揀次子文襄之嗣子也韶年食餽中萬歷丁酉副榜以廕任尚寶司司丞奉使冊韓藩賦詩託寄恬淡寧靜不擾驛遞繼賫餉秦中故事解交有滴珠陋規務觀止取正數詣陝藩仍以

例索且疑有乾沒務觀正色曰我清白家子豈等等常逐末輩乎

藩慚謝生平矯矯自立毅然不苟人咸謂不墜家聲云

見舊志

李穎字夙脫性孝謹年十六童試冠軍天啓間屢試數奇由選貢授

沈邱廣文時學使者試菊花賦走筆立成學使者擊節稱善再補

鎮平廣文秋禾不登益勵教化士有餓死不敢爲非者陞平涼令

輕徭慎刑抑強恤乏西雍甘棠久而不翦邑庠公請從祀鄉賢

見舊志

劉孟奇字詒齋任鄒平丞以廉稱民尸祝之餘詳雜志

劉倚勃字漢甫以恩選爲安塞令少貧勵志讀書事繼母以孝聞平

居言不妄發步不踰閫其居官也剛方正直利不能誘威不能怵

一時稱爲廉吏解組歸里袖惟清風長子饒廩黌宮家徒壁立有

清白遺風云以壽終入鄉賢祠

見舊志

秦毓字瑞明孝友性成以詩魁萬歷戊午鄉榜天啟乙丑成進士
司李淮南丁卯典文武兩試所得士皆有文行淮故多猾胥號難
治毓秀至忠信明決吏不敢欺雪崔氏母子寃決徐州守汪心淵
積案他如捐羨鹽戢強寇開河濟漕皆彰彰在人者既歿聖人請

祀鄉賢

見舊志

秦毓慶字德明以詩魁崇正癸酉鄉薦與兄毓秀後先媲美邑有公
務必正色直言不避嫌怨雖事業未顯而文章炳耀一時論人物

者多推秦氏伯仲云

見舊志

高瑞雛字壑昂都憲捷之長孫也性嗜墳典早歲入黌序以官生任

南京右軍都督府經歷守正不阿居官廉慎與人無忤致仕後隱居村墅日以讀書爲事邑侯慕其賢屢請入鄉飲不赴遠邇稱爲完人子有聞增廣生勤學好義克繩祖武

見舊志

高欏字元印務實子爲人真率不立邊幅承祖文襄廕任尚寶司司永嘗使楚賑活饑民數千使蜀雪劉良張賢等寃後歸里會蜀兵噪鄭鄭人危若累卵適劉良子在軍感欏德解兵南歸鄭幸得免晚年積藥濟人歲費無算崇正辛巳大饑多方設計贍養饑民賴以全活甚衆其生平慷慨好施類如此

見舊志

新鄭縣志卷之十七

人物志五 列傳

國朝

張光祖字大光號岫嶂七歲失怙恃育於祖母吳稍長家貧更遭流
寇之變祖孫相依定省不以流離懈吳安其孝養享年九十有七
乃終光祖性嗜學下帷靡間寒暑順治丙戌登賢書己丑成進士
辛卯分校北闈得人最盛出知山東恩縣下車卽革去民輸官麥
銀二千餘兩邑多盜設策捕除民獲安枕又有河舟役爲民累相
國洪公南征過恩光祖泣涕力請洪特爲蠲免積弊永除以茂績
屢膺薦剡考最陞兵部職方司員外郎汰老弱黜強梗節冗糜昭

恩信軍政爲之一清庚子典試四川中夜焚香自誓務拔真才一時入彀者皆文行兼優之士還朝授兵部督捕郎中廉明有威京城宵小屏跡有旗丁携家潛逃被獲解赴本衙內有少婦方孕法應鞭背光祖請諸掌曹俟產後行法仁心行而國法不廢康熙元年督學四川所識拔皆名俊如韓檢討士修張相國鵬翮尤其卓卓者也事竣報部遵例回籍候補日邀親故爲宴樂足不履公庭惟樂施予周乏濟急邑中士求提誨者甚衆光祖悉心指陳教人以醇正爲宗卒之日士林鄉里皆流涕思慕有慶會稿見山草勸學書祀四川名宦新鄭崇祀鄉賢

劉楨字鍾嵩天性醇篤凝重不佻順治戊子膺拔貢當授官以母年

高力請終養服闋選廣東潮州府通判陞江南鎮江府同知繼又
左遷廣西潯州府通判內陞大理寺寺副遷寺正陞戶部廣東司
員外郎刑部江南司郎中外轉貴州黎平軍民府知府方其在潮
也郡地濱海又值初附平靖兩藩防卒有爲善良受害者楨職司捕
務遇有警輒深夜率衆擒逐盜賊屏息舉人楊某家故殷富奸民
誣訐通海營員加以文致楨察其寃爲力直其事揭陽土豪余仁
故賊黨也雖降嘗蓄叛志藐法抗官楨奉委廉察設法誘擒置之
重辟一方以安在鎮江時有察海使者以沙洲近海恐資寇糧令
民內徙有不當徙者亦誤在徙中累代室宇一朝毀棄兒啼女號
情狀堪憫楨蚤夜籌畫於臈旬洲團洲等十餘處皆援三千隅之

例存留強半保全數千家郡紳直重光張九徵張玉書蔣超等皆
作詩歌誦美之潤民田禁州等八十三家緣事牽連上憲欲以通
海論槓時將解任設法拯拔不二三日詳准結案皆稽首歡呼慶
獲更生其他却苞苴拔單寒歷任三十餘年善政多端不可枚舉
壽八十二卒於家祀廣東潮州府名宦

劉曰桂字仲旭新鄭人黎平太守槓次子生而凝重初就外傳危坐
呶唔若成人康熙戊午以麟經魁於鄉計偕至都諸名公爭折節
延致有諷以閣中私竇者婉言謝弗與通嘗隨父黔南任父爲挾
嫌者誣陷曰桂挺然以身當之多方剖辯乃得白姪塽兩遭大獄
破產營救卽饔飧不給晏如也乙酉補內閣中書每晨入必先歸

蜀後歷年不少懈一日部胥以稍爲通融即可速飛爲言桂瞿然
曰孰能政而欺同官寧久滯弗爲也故事閣中票僉閣師以親筆
下中書繕錄進呈或偶用捉刀桂恐其僞莫辨力持不可閣師亦
改容謝之戊子典廣東試事道出江右或干以私正色叱之其人
慚懼而去入閣後與諸同事約務秉公忠復焚香誓於神前癸巳
分校北闈亦如之所取皆知名士大宗伯青陽吳文簡公襄卽其
房首也內艱服闋卽懸車不出性孝友不事粉飾其父偶得恙桂
早夜調護參藥湯飲不一假手婢僕或勸之休桂曰此非他人所
可代也繼母高氏晚歲抱疴桂年已踰艾日再省視諭婢妾謹慎
事奉雖隆冬溽暑無間母心甚適若忘其非已出者父母歿念及

二親生前事輒涕泣嗚咽如嬰兒父平日訓言珍藏笥篋中數十年後每出示子若孫曰此爾祖昔年在某署寄以教我者墨蹟如新封題宛然歸田後鍵戶讀書從未以片紙干守令至有公事需衆議則直陳利弊民間疾苦無纖毫迴護隱忍鄭人陰被德焉時鄰邑有聚盜捕流言將爲亂民爭逃匿至棄嬰兒於路官弗能禁桂乃置座通衢往來勸諭數日安堵如故全活頗多待兄弟友愛教子以義方孫有恪守禮法閭內外有矩矱又設家塾五楹凡親族隣里有志讀書者俱令來或入塾自誦書史標發義蘊後學多所成就如某等皆由是而進或入塾自誦書史標發者亦多周恤焉制府田公甚重之榜其門曰望隆朝野豫撫雅公

採其行入中州彰善錄壽八十五終子壻別有傳

採府志叅中州彰善錄

劉曰江字叔顯黎平太守楨第三子康熙丙寅優貢任永寧訓導邑
補無科名江蒞任教諸生以敦品之學行文之方訂功過格人各
給一本每月朔望齊集明倫堂懲勸並施士風丕振累科獲雋者
數人永邑士林至今懷思焉

劉齊法採訪

張信字中孚四川學使光祖之中子也負逸才讀書數行俱下目一
過輒終身不忘十七補博士弟子員旋入成均卽棄舉子業日沉
酣典籍于書無所不窺爲文章援筆數千言立就尤豪于詩短歌
長咏俱極其致與同里王九式徽人汪其試輩相唱和晚年失明
益縱酒賦詩不少休閒寄興小詞或自以絃索度新曲論者咸謂

有元人風致焉所著有覆瓿十卷懶餘二卷兄寬字敷五性樸魯
力學不倦爲名諸生慷慨好義嘗值考貢符下有李生者已承其
缺食餼矣無何寬以期尚未滿復還籍李生大窘人告寬寬卽以
廩讓之無吝色晚年立社以教學者一經指授皆能有成歿後猶

多思慕不置云

蔡相
採訪

劉曰燧字又仲黎平守楨第六子性方嚴不苟言笑髫齡時卽耻爲
兒童戲年十五入庠旋食餼父任黔南以疑似被誣幾至不測曰
燧時年甫二十冒險走長安諸艱備嘗卒雪其誣乃已姪填累陷
大獄曰燧力爲營救嘗夜渡黃河值冰結卽緣冰而過人爭危之
不顧也其至性純篤類如此屢試秋闈不遇援例入太學考授州

司馬入明史館多所分校後以原銜借補江南桃源縣丞管河
桃源爲兩河第一險工修防始終無患前督河大司馬陳滄洲先
生深器重之縣治地勢窪下每雨泥深尺許人甚苦之曰燧損貫
砌石成道邑人感戴于道旁立石大書劉公街三字旋以病告歸
杜門不出日課子孫讀書自娛壽七十有一

劉齊法
採訪

邵瑗字心蘧與兄珮俱師事上蔡張仲誠先生稱高弟賦性嚴正不
妄交遊日閉戶以讀書爲事尤究心音律著有五音相轉譜由歲
貢生任夏邑訓導克稱其職數年卒于官

蔡相
採訪

劉墻字元達內閣中書曰桂子齒齡時端重如成人弱冠補弟子員
旋食餼援例入成均考補胄監教習期滿旋以內閣中書充四川

丈田使者事竣議敘仍發四川以知州用補雅州府天全州知州
州屬新設糧賦科條斟酌合宜至今稱便調茂州直隸州知州州
有三齊寨土司撫軍欲改土歸流壻力持不可大意謂渠素忠順
一旦易置必失衆土司心且境連外蕃宜留爲屏蔽提督黃亦三
是說撫軍疑爲迎合盛氣相加不稍挫卒以是調簡去補成都府
簡州知州時金川跳梁大軍徂征檄催運輸日夕至他邑或濫派
乾沒民多觀望不以時轉壻獨明開欵項榜州治前關領銀兩至
卽給發有不敷者出俸餘足之民感激爭先率無失期兼署綿眉
治亦如之金川平推陞湖北施南府同知遽引年歸優游林下十
有餘年居平念女兄家產寒薄慨然予田百二十畝復召諸甥至

家延師教誨姪孫幼失怙恃憐而養之卒年八十有九

勞補採訪

劉靖字原圃桃源丞曰燧子幼而英敏負至性五歲喪母擗踊號哭若成人十五補弟子員試輒冠軍庚子中副車兩座師見其風度秀異惋惜久之雍正五年河東田制軍以孝友端方薦由崇安彰化二邑令陞永春直隸州知州丁艱服闋補直隸景州遵化直隸州陞雲南順寧府知府署迤西道事歷官三十餘年所至皆有政績崇安爲趙清獻舊治靖至一以清獻典型自勵境內有封禁山委靖清查時同官有因嚴查匪類遂誣衆謀逆邀功圖陞者株連崇邑多人靖力爲昭雪觸上官怒不恤也福安縣濱海潮水泛溢百餘里咸遭漂沒男女赤身多至數千任斯土者不能理上官委

靖往旣至卽捐廉俸置辦衣糧給男女賴以全活者甚衆其已死者悉爲瘞埋焉所費不下三千餘金上官聞而益重之歷任勤于民事案無留牘且各得其情吏民驚以爲神生平無他嗜好惟以詩書自娛卽逆旅中未嘗釋卷所著有宦閩公牘封禁山紀事片刻餘閒集年七十三解組歸越二年卒仲子如鐸字穎新幼聰穎善書畫詩文有奇氣孫端人陳未齋兩先生皆引爲高弟援例入太學屢赴北闕未售後以州吏目分發甘肅未任卒

高岱採訪

高克昌字如文增生忠厚誠懇鄉里推重邑中文廟奎樓兵燹之後久經荒廢昌率同儕白之令君一一修整經營區畫身爲衆倡費

省而工堅與鄉飲二次年七十有四卒

見舊志

王作礪字敘九雍正癸丑歲貢質直醇厚性嗜學終身不倦一時從

學者甚衆所著有大中指掌抄

張紹芳採訪

趙允升字克敬康熙壬午舉人少與同里張道生齊名一時數邑中能文之士莫不曰張毅菴趙克敬云性尤嗜學嘗屏居具茨山中晝夜攻苦八載不輟平生足不履公庭遇邑有大利害則慷慨指陳不少沮新鄭舊苦徵糧加耗克敬力白于邑令詳請減耗人皆德之累上春官不第以謁選授安陽教諭未任卒

馮永祚採訪

張道生字逸菴幼聰慧資稟異人尤工文章早歲卽廩于庠錚如也後益力于學問文譽蔚起兩河操觚之士一時歛手推服康熙己卯中副車辛卯登賢書兩試南宮皆被薦旋以疾歿聞者莫不以

道生之才不獲登上第僅中壽而死爲可惜也平生爲文甚夥歿

後盡皆散佚所存數藝皆得之人口傳誦云

王琳採訪

蘇生吉字永淑康熙丁酉歲貢幼聰敏至性過人八歲時父病獨行
數十里爲延醫道值風雨弗少阻父歿哀毀若成人奉母至孝家
雖貧必竭力具甘旨與弟白首同居無間言待猶子一如已出族
人有貧者量力資給之以爲常平生嗜學不倦尤究心四子書舉
儒先與義悉有以鉤貫而折衷之前後邑令慕其學行皆聘爲義
學師多所成就學博郭先生雅重之歿之日與其門人私謚爲節
先生中書劉仲旭表其墓姪瑞樹亦有文行能世其家
馬永祥撰
毛振字聖音質魯篤志誦讀年十九補弟子員旋食餼康熙壬辰膺

歲薦醇謹嚴正口不臧否人物遇親友有過則必正色相規無與
辭尤善事父母嘗因事外出忽心動卽遄歸父果抱恙見之色喜
疾旋愈母省農鄉居振集友爲文會稿未成而心動度必以母故
急往視則母果病人爲孝感一夕火不戒逼母寢室奮踊呼號火
忽反室卒無恙學博楊邑令石皆重之居喪盡禮刪定家禮一冊
名爲四禮自用稿建先人祠宇置祭田畀子孫世守焉平生教人
先躬行後文藝文但取明道不屑屑於聲調計工拙一時遊其門
者上者登賢書次亦有聲賢序及卒學者私謚敬德先生

馮永祚
採訪

顏澄字子靜敦行誼言動有法早歲食餼于庠績學工文累試高等
尤研精四子書爲人講說娓娓不倦弟子著錄者甚衆後以明經

選南陽訓導未任而卒

馮永祥採訪

安皆吉字文六少入庠高才嗜學累試冠軍爲文刊落浮辭獨標精義一藝出輒膾炙人口侍御慕廬王公令新鄭時見之曰文造此境榮世壽世無不可矣亟命其子播青太史從而就正焉聞中屢薦元魁數奇不售竟以明經終侍御嘗欲刻其文皆吉哀集數百篇悉付之會遷去不果其稿竟爲持去人皆惜之

張紹芳採訪

郭敦倫字厚凝髫齡入泮爲學以實踐爲期不事章句少失怙事母每先志承顏友愛兄弟怡怡無間姊嫁而貧迎養於家族人某因瞽廢業鬻產將盡敦倫悉爲贖回費百餘金不少吝族婦郭氏少寡無子其家迫令改適欲投洧水敦倫急救解取姪爲嗣併贖其

衣食賴以完節終雍正六年制府田公以孝廉薦授廣東樂會縣知縣旋遷陽山再調感恩其在樂會也有豪家饒於貲數殺人悉以賄免敦倫至勘訊得實豪獻萬金怒却之卒寘于法人皆稱快陽山舊有陋規凡官中所用俱取于民又井宇牲畜之屬亦令供稅敦倫一切革除民困以甦感恩地居海中素多瘴癘上官惜其才囑以大事過海辦理餘第委典史敦倫不肯規避勤于職事竟以勞瘁卒于官囊無餘貲幾不能歸葬云

馮大興採訪

女安仁字樂天幼孤力學十三應童子試爲邑令石公所器重令其孫締交焉弱冠補弟子員每試輒冠其曹癸卯受知于學使者選入成均相國介休孫公時爲少司成一見竒其才以遠大相勗且

誠以勿小就卽決計南歸同人懇留不顧也會舉賢良方正當事者欲以安仁應選力辭乃止闔中屢薦不售亦無幾微不平之色其勇于從善淡于仕進類如此平生與人接嚴正和平望而知爲有養之士教人有成規不稍假而開迷指誤則娓娓罔倦故遊其門登賢書列膠庠者甚多年六十餘選羅山教諭未任卒

劉國奇採訪

白士宏字任重幼而穎悟日誦數千言九歲能屬文十四補博士弟子員登雍正丙午賢書主司見而稱之曰此嘉魚復生也丁巳成進士授四川資州并研縣知縣催科撫字咸得其平庚午癸酉兩次同考所得皆名下士旋以終養告歸行橐蕭然攀留載道家居孝養益篤杜門謝客專以獎誘後進爲務諸弟子執經者戶外屢

常滿莫不有所成就學者每謂從先生遊如入太匠之門大以成
大小以成小無棄材也生平方正和雅風度蘊籍名滿中州年七
十三終著有衣德堂講義制義從兄士魁字景辰和平樂易與人
無忤爲文則字烹句練擲地有金石聲行誼詞華一時模範雍正
壬子舉於鄉墨藝膾炙人口以知縣管鹽場大使事卒于任

王琳採訪

王施字駿公康熙丙寅拔貢孝友性成尤嗜學平生書卷不去手擁
臯比爲人師因材施教各有所成任涉縣教諭嚴立課程八載不
怠以丁艱歸優游林下邑令延爲鄉飲賓壽至八十有二

王琳採訪

王輝字元功性穎悟早負才名雍正丙午舉于鄉以明通任延津教
諭師範克端士風爲之一變考滿陞山東朝城縣知縣爲治惟急

撫字不尚催科值歲饑請開倉賑濟民賴以生又建立義學振興
文教以無疾卒于任人多惜之子賜彤字慶弼輕財好施樂善不
倦嘗憫南關外溪澗深濶每逢秋夏大爲行旅病慨然解囊橐建
石橋工垂成賜彤病歿橋亦旋壞時子辛年方幼善體父志鳩工
重修越三載始竣前後費千餘金不少惜人皆多其父子好義因

名之曰濟美橋云

王琳採訪

王錫伯字德長雍正丙午舉人少英敏篤志詩書爲文章力追先正
痛掃浮靡之習學者多取法焉性尤慷慨能斷大事不避嫌怨有
邑令欲貸民間千金集紳士議之座中率不敢先發錫伯力陳其
不可令遂止丙辰計偕歿于京邸人皆惜之

蔡相採訪

李晉字康侯少爲名諸生性嗜學作文悉秉先正一藝出人爭傳誦
之雍正乙卯舉于鄉一上春官不第卽不復登公車嘗自謂非用
世人富貴遠堅不赴澹泊自守唯日以研究經義爲事尤好獎誘
後學遊其門者一經指授率成名著有松川講義松川制義高岱採訪
爾庚字子西少力學爲邑名士雍正己酉膺選拔初爾庚娶妻貌
陋且失明母不悅欲出之爾庚曰劉廷式何人哉吾庸不能效之
耶伉儷彌篤邑舊有義學延爾庚爲之師教人先品行而後文藝
一時登甲科遊膠庠者率出其門太守朱旌其闕入鄉飲張紹芳採訪
王敬求字聖功幼聰穎力學不倦弱冠名噪黌序嘗試秋闈主試者
閱其文大加嘆賞將首舉以疾未終闈主試者深爲悵惋居家孝

友與人接忠厚和易人皆樂與之遊從學者甚衆娓娓講說無倦

色邑令王太守朱前後旌其門後以明經司訓夏邑值歲饑捐俸

賑濟夏邑德之立碑表其事致仕歸入鄉飲

高岱採訪

高珏字二玉歲貢生性嗜學自幼至老手不釋卷嘗築精舍於別墅

讀書其中遠近聞其風執經問字者無虛席教人無材質高下各

有以成就之壽登八十有八入鄉飲卒後羣弟子立碑墓側

高岱採訪

柴枚字簡臣沉敏好學爲文章醇雅有法度歷任吳公卜雄甚重賞

重邑人士遊其門者隨所指授多成名後劉君息縣人進士

諸生曰于坊選中誦枚文心摹手追遂試高等食餼于庠其妻

鐸新鄭枚已先亡躬詣墓致祭枚以明經授內黃訓導未任卒

劉齊泗字逢澤施南司馬塢長孫父早歿事繼母至孝性聰穎中乾隆辛酉舉人乙丑利明通佐邑侯陸公勦建書院延名師訓課多

所成就年三十二卒閩邑惋惜

蔡相採訪

曰順字耿齋井研知縣士宏長子天資穎異有逸才入庠試輒冠軍爲文精深雄健有國初諸老風格督學使者嘗稱之曰中州佳士弱冠登乾隆丁卯賢書戊辰聯捷進士授直隸趙州高邑縣知縣蒞任四載廉仁明決興利剔弊吏畏其威民懷其德一時有神君之稱上憲嘉獎方推循卓惜天嗇其壽以勤勞歿高邑爲立碑紀其德政生平著作甚富歿後散佚僅存衣德堂詩集及制藝

王琳採訪

趙涵字心堂壬午舉人允升子也少負才倜儻不羈雍正乙卯登賢

書以謁選任浙江宣平令居官廉介自持甫下車卽革去鹽商規
禮邑舊有協餽軍糧一項以道險折收價昂甚宣民苦之漚至輒
減其價民皆稱便于圄圉尤加軫恤夏施藥冬給衣每歲以爲常
宣人聰穎者頗多然率不知學適冲真觀黃冠饒貲財所爲多不
法筭而逐之改設書院俾士子讀書其中文風爲之一振有監司
猾胥恃勢漁肉其鄉里漚遣役捕捉痛繩以法卒遭讎訛而罷囊
無餘貲新米不給旋病卒上官憐其貧資給始克歸葬爲永社
趙繡字錦章歲貢讀書砥行以禮法爲則性忠厚與人交無欺言遠
色望而知爲德人任武安訓導當官有能聲不數載引年歸馮永

新鄭縣志卷之十八

人物志六

忠節 孝義
附鄉耆

臣無二心天之制也此鄭原繁之語而真西山先生取之云可
以立萬世爲臣之大法甚矣鄭之多君子也然自鄭以後見于
史傳者甚少惟舊志所載明季殉義數人而行事甚略卽問之
故老亦鮮有知者每展卷及此未嘗不廢書三嘆也夫忠有大
小而無二心則一也故仍立爲一傳而以原繁之言著之首簡
亦以教忠云爾作忠節志

明

賈謨小丁保人崇正年間同子洪沛領鄉民掩殺流賊斬數騎衆寡

不敵父子俱被害

劉榮邑庠生賦性剛直輕財重義爲父建坊雖貧無怨崇正年間罵賊殉難至死不屈

李崇謙倡義守城拒賊力不支衣冠北拜遇害妻曹撫孤守節自有傳

馮三仁新鄭人狀貌魁梧流賊強授僞劄不屈大罵而死

劉允元原任臨城縣教諭

馬文林貢生

蔡震監生

俱崇正間流寇掠新鄭守

城殉難

柴彬

吳生泰

白育秀

吳紹泰

蔡勃然

沈忱

趙錢

陳赤衷

高 燦 俱生員崇正間流寇入境遇賊不屈殉難

趙升階 高有則 秦 鉢 秦 標

李應祝 高 權 宋 錡 牛時發

牛時耀 劉澄若 白光復 陳 瑜

劉耀祖 杜暢之 劉 景 沈作孚

劉 晏 王 舉 張文彩 高祚昌

沈道脉 劉溱若 王 璠 劉 紳

毛南宮 劉 孝 劉雅化 李之妍

田生芝 劉 瀚 李天植 李林盛

陳希安 王尚義 劉滙若 樊體健

陳九敘

以上俱鄭民流寇
入鄭守城殉難

蘇明彥字中倫性敏毅弱冠廩于庠明季避亂密縣五里店流寇鍾
慶秋率衆攻砦明彥偕衆守禦甚力俄砦破賊偉其材迫脅使從
明彥不屈擁至紅沙河踞地大罵遂被殺

馬永祚
採訪

孝義

孝爲百行之原故紀載者必及焉鄭之先頴考叔以純孝稱公
子去疾以讓國著嗣後聞風而興者代不乏人遂次第錄之其
見于列傳者不重見也義行亦後漢書獨行之一端也其由孝
悌而推者乎故并及之作孝義志

明

張燧字得志邑廩生幼卽以孝友聞於鄉及長事父母處兄弟益盡
厥職父美字文輝亦博雅君子年六十七于成化乙巳先卒母許
氏有賢母風享年七十七于宏治戊午又卒燧哀毀過禮幾弗能
起及葬結廬墓左朝夕悲號又自負土成墳壘積如山遇大風雨

雷電輒不敢寧息必環視墓園恐或震驚焉居數月有羣盜夜聚廬外欲害之見其孝行皆惻然感動跪拜而散時有嘉禾異花產於墓前又有雙燕落懷中馴甚揮之不驚雙鵲巢墓上者三年雖觸之不去有司上聞遂旌其門後以明經選學博不就隱居大隗山而終里人重其行為立碑紀其事碑見金石志

採明史及廬墓碑按明史燧

作遂釋其字當以史為是

王科東趙保人幼喪母事父克孝父嘗患腦疽科口吮出膿得愈後

父歿廬墓三年詔旌其門

見明史并省志

端可榮庠生性至孝母病籲天請代母歿未葬時遭回祿依柩哀號

火為之滅平生廉潔自砥且好施與家累千金晚年始盡

見省志

張賢庠生性至孝明季流寇猝至父年八十負而逃難賊近勢難兩

全負父不捨同時被害里人傷之

見府志

谷天祿良輔之子也良輔名忠少與弟恕遊邑庠恕貢入太學任永興判簿良輔慷慨好施予以壽榮恩冠帶嘉靖三年卒年八十五天祿事親最孝遭父喪哀毀踰禮及葬廬墓側奉母郤氏能得其歡心亦享年九十三終嘉靖十年固安楊惟聰督學河南遂以孝旌之後鈞州知州廬陵劉魁復爲立石旌其門

採谷氏墓碑補

裴鐸字景鳴師固保人事親以孝聞父歿哀毀骨立及葬廬于墓側者三年負土築墳哀慟之聲人不忍聞嘗有羣狐夜列左右將曉散去復有白兕雌雄一雙穴于廬旁數年生子者再往來自若一

日風雷大作四鄉稼禾多被損壞獨鐸一村及壠次無恙鄉人咸

為孝感所致同邑御史邵進為作文以記其事

採裴孝子
廬墓記補

柴林字茂野邑庠生質行端潔中年失怙哀毀盡禮事母益孝有幼

弟三人林體母志友愛愈篤親自教訓並列醫序善治家產厚與

弟而薄歸己督學旌之子孫皆克繩武不忝萬石云

見舊志

陳福 侯冕 劉英 張萊 成化丁酉捐賑穀各一百五十石照

例給與冠帶榮身

王誥 唐質等二十人成化壬寅捐賑穀各一百五十石照例給與

冠帶榮身

白鳳書候選經歷萬歷九年至二十六年尚義賑荒共捐穀三百石

銀三十兩棺木一百具有司屢旌其門後兩院題請旌表

李承芳等三百三十二家萬歷四十五年捐雜糧銀錢二千四百七

十餘石知縣陳大中申明院道給匾旌獎

以上見舊志所載雖不盡列名氏然存其事以

見好義之

一班云

劉承源字本之號向若邑廩生瑚子性孝友色養備至父中年得拘

孿疾晝夜侍奉便溺必親數年如一日父亡哀號痛切幾至毀形

母病沉痾呼天籲日偕尋請代隨剜股肉以救母病即愈處兄弟

慈愛深至鄭士礲瘠風苦差徭族人或被累困窮鬻及其孥源輒

出貲以歸之喜讀書寒暑罔間廩食三十年十試棘闈辛酉始得

鄉舉時論快焉及卒王鐸志其墓

節王鐸所撰墓誌銘補

國朝

李天培字蒼元順治五年歲貢臨漳訓導敷教以寬多士感悅會漳水瀑發城不沒者二版培偕守令虔禱補築水患以息至白其地沙土二色於漳令地糧得均漳民賴之還李加祿妻厚遺之金夫婦以全尤人所難仕至國子監學正

趙國敬性孝友母病奉侍湯藥百餘日衣不解帶嘗捐地捐資埋塋

族人收瘞白骨終身不入公庭年八十四卒邑令旌

以上舊志

史明哲父連芳與人鬪憤而縊死知縣馮嗣京杖其犯一百斷埋塋銀十兩明哲泣曰小人父不得其死今正法幸矣何忍因父領銀令曰爾有老母何不以供甘旨明哲泣曰小人雖貧傭工尚可養

母不忍見此銀也邑令嘉其孝卽以所斷修魁樓以成其志

李四貴母病思肉割股以進遂愈母年八十三孀居三十餘年人稱爲一門節孝

高良福母疾湯藥不效割股奉母疾遂愈至九十餘乃終邑令旌

吳文朗西坊保人繼母病文朗割股以進疾旋愈

以上俱見府縣志

高緒之字顯鳳性仁慈不喜殺生尤嗜書生平竭力購求所蓄古今

典籍略備由明經司訓盧氏士之不能赴鄉試者悉助其資斧使

無困乏憂旋里後憐堂姪家貧割腴田百餘畝資給之他如施衣

施粥周卹貧民鄉人多感其德歿之日門人私謚曰孝靖先生所

著有殺生辨存遺詩草

高岱採訪

蔡克讓字允恭邑貢生天性孝友初就學未卒業慮無以慰父志手

一編且泣且讀晝夜靡間廩于庠有文名母嘗遭惡疾親侍湯藥

夜則和衣卧床下歷三年不稍懈平居事二兄備極友愛邑令重

其文行延爲義學師遠近從遊者甚衆盡心講課多所成就門下

士藍芝家酷貧克讓資給之併爲娶妻之入庠後旋亡遺一子名

玉鼎復爲之飲食教誨俾入賢序他如助糶施衣濟急扶困不可

勝數壽登八旬以耆德累入鄉飲田制置旌其門曰克振儒風子

元齡亦以孝聞別有傳

高僧

黃先知字子哲幼純篤潛心力學弱冠卽棄舉子業以存心制行爲

務聞張伸誠先生倡道下邑不計數百里遊其門師事之與人交

取與一介不苟尤敦內行遭父喪哀毀骨立三年未嘗入內司訓
新鄉劉淵源雅重之嘗旌其門爲作黃孝子傳以表其行

馮永祥採訪

劉洪字子寬寧國知府樂五世孫也年十七補博士弟子員性長厚
尤篤孝友髫齡出就外傳中夜心忽動卽冒雪歸值父傷足日具
湯藥親爲洗濯閱三月獲愈母嘗患瘡幾殆針灸不能施洪以口
吮之乃就痊伯父中書于鼎避寇難歿于河北洪不憚千里出入
羣寇間往收骸骨以歸具禮葬之平生自奉甚儉一布袍數十年
不易遇人有窘急傾囊助之無吝色年荒出粟賑饑全活甚衆其
他善事不可枚舉家本素豐往往以好施至有索逋者前後邑令
屢請入鄉飲不赴皆給匾旌其門壽登八十有八

蔡相採訪

趙善長字純元事親孝友愛諸弟尤無間季弟困童試苦弗售爲之

援例入成均破產無吝色丙辰登賢書累北上不第授滑縣教諭

三載循循造士學使徐重其行旌之致仕歸七十餘年

馮永祚採訪

萬鳴珂字佩玉庠生父以性倜儻慕班定遠之爲人一日慨然曰大

丈夫安能頽首伊唔以老耶遂棄家遠遊不復返遣二子於家長

三齡次甫十月卽鳴珂也珂生而穎異純孝性成數歲嘗問母曰

父何往母曰流寓他鄉已久矣珂爲號泣終日年十五毅然以尋

父爲任母曰汝父以不得志而去汝宜刻勵以繼父志且汝年尚

幼隻身遠出是重吾憂也珂恐傷母心暫已其事益肆志典墳雖

盛暑嚴寒常至丙夜不倦年二十入庠脩以尋父之役請於母許

之私語兄曰母有兄在母可無慮子不與父同歸安用子爲相泣
而別出齊秦晉最後至燕邸梁時疫歲瀕於死有以奇方示者服
之少差訊其所自云關東岐黃萬先生曾傳此方活人甚衆珂聞
之心動兼程以往邊關緊嚴冒死而過數日果遇問其里居悉合
跽請而歸歸亦入庠父子俱有聲後序里人咸稱其孝

劉齊法採訪

邵珮字璫珩增廣生篤孝友父有所嗜非時不可得珮典衣以求踰
數百里卒致之而歸兄蕩其產一姪復外出迎兄併姪之妻子養
于家一如未析箸時族姪病亡貧無以歛具棺葬之嘗冬月遇失
明童子寒餓幾死珮收養之且爲延師俾習星命之學平生教人
以敦行爲先弟子有貧者輒却其束修壽登八十有九邑令延爲

飲賓珮少時受學于從兄瑛瑛字廷瑞敦品力學有聲黌序以拔
貢任獲嘉教諭雅意作人訓課不怠獲嘉人士稱之

蔡相採訪

吳思字曰睿歲貢事親孝父性嚴厲每見思則顏爲之霽待弟尤恩
愛弟惠爲叔後憐其貧割腴田數百畝益之仍自輸其租平居一
味之甘必與惠共惠不至輒愀然不樂同人名其齋爲偲怡堂年
近八旬手不釋卷從遊甚衆多所成就學使重其行旌之

馮永祚採訪

白爾猷庠生敦本恤貧少時與兄弟析產未嘗計肥瘠後其姪家業
中落屢相伙助費幾百金鄰里通緩急者逋欠累累視其力不能
償卽不取索性慈愛見饑者食之寒者衣之下至無賴如僕亦體
恤不忍凌辱治家有法一以勤儉爲主家人十歲以上無敢早眠

晏起者九歲課子孫鍵戶肄業不少假借子若孫入成均者六人
登賢書者一人提南宮者二人壽九十三終

見中州
彰善錄

蔡元齡稟貢生克讓子監生九歲喪母哭泣感旁人父嘗患泄瀉褻
衣親自浣濯父年高衰憊每食必侍出入必携杖以從繼母生二
子元齡親自督課以慰父心事繼母愉婉曲至母或不悅卽長跪
請罪俟母意解方起母嘗告人曰齡兒孝順雖親生不及也弟或
不率教卽痛自刻責積誠相動不欲嚴斥忤母意其弟亦感悟一
遵兄命式好無間言父克讓少時以孝稱元齡能紹其父孝子之
後仍生孝子蓋亦天道然歟

見中州
彰善錄

高善祥監生與弟友愛將析產讓肥受瘠器用什物皆取其舊者胞

伯高光家貧病故善祥卽爲殮塋無難色

見中州彰善錄

賈宗孔事母陳氏孝乾隆六年七月母病沉重宗孔於十三日夜剜

股煮湯進於母翌日母忽勿藥而汗沉疴霍然若脫

見中州彰善錄

顏瀨母得癰症歷年不痊瀨侍奉無懈一日母思食羊肉購買不得

隨割股爲羹以進母年七十尚豐鑠人以爲誠孝所格

見中州彰善錄

張福佃農爲業家貧常不舉火於道上拾銀三十餘兩坐待踰時有

人皇遽而至卽失銀人也詰問確實卽還之酬之不受亦不詢其

姓氏道旁者問之福曰物歸故主吾事畢矣何必知其人

見中州彰善錄

劉遙字星舍監生幼孤事母以孝聞兄早卒侍孀嫂尤甚恩禮平居

淳厚仁慈鄉人求資助者無不立應不能償輒焚其券嘗值歲歉

出粟賑濟待以舉火者甚衆他如拯人之厄助人之墓罔不章章在人耳目間同里公舉義行邑令旌之壽八旬終

王琳採訪

商文玉字鳴佩生幼孤事母盡孝待弟有恩愛弟遭疾醫多言其不起文玉念同懷誼不忍令以白衣終急鬻產捐貲俾爲國子生報至而卒嘗憐歲饑丐者輒輸文玉解腰纏遺錢盈道僞作不知狀丐者爭拾取之其爲善惟恐人知類如此文玉性謙抑善下人與人交必以誠貧士與之遊者尤多所賴人以此重之

高岱採訪

李培業儒先世無遺產培以善治生得稍裕有弟亦貧父母喪塋事培獨肩之又念弟無以自存以已置田三十畝給之耕而自納糧如是者三十年不改妻趙氏亦善承夫志聞叔姒匱乏周卹不倦

有庶叔祖母家貧迎養於家子成幹孫勁俱庠生

見中州
彰善錄

翟壽兒嘗拾銀九兩閱數日有羅姓言在李芬案上失銀爭辨不已
壽聞之即將銀交還羅欲酬以半堅不受邑令陳太守朱皆旌之

鄉耆附

明

張希霄性稟慈祥樂義好施自族人以至鄉黨靡不沾其惠澤賣產周人尤爲盛舉壽八十餘歲

胡希賢鄉飲賓區稱達尊有二壽八十四歲

端如松入飲賓區稱賓於虞庠壽八十九歲

郭煥然庠生剛方正直古貌古心壽八十一歲

郭天中樂善好施終身不識縣庭縣令獎曰齒德兼隆壽八十二歲
白鳳闔字螭陽弱冠入庠穎悟醇質讀書有大志少失怙哀毀孺慕
孝事孀母友愛兄弟內外無間言諸如扶危焚券修祠建橋爲善

甚力義方教子長子燭食餼仲子灼拔貢叔子超歲薦季子遠探
芹壽七十三歲邑旌德行一次飲賓十次

萬崇律性貞介樂善好施教子以義方卒以成名人皆以爲善報子
登賢書謙謹一如平日鄉人化之入飲賓三次

吳適字天泉庠生天性孝友承前啟後恤孤濟貧畊讀訓子外詩酒
自娛德重鄉評壽踰七十屢入賓筵

國朝

商務正事親極孝兄弟友愛無間與人交必以誠少勤儒業晚娛花
石嘗書坐上客常滿及小園日日花開之句以自況年登八旬累
召鄉飲不至里中稱爲善人

李詡性耿介質厚而慧頗耽典籍事親至孝惠撫弟姪教子以義方
歷年七十餘足未一至公庭輕財好施周人急難子四孫十四曾
孫七先後皆人弟子員

劉倚龍十歲失怙事孀母備極孝養壽至八十餘長子湛遊庠食餼
孫曾四世同居里人稱之

劉楷字端甫邑庠生好學循禮琴書自娛入飲賓一次壽八十二
高杠號濟寰務觀子文襄嫡孫襁褓失恃事繼母以孝聞異母弟八
人友愛無間弟早亡撫姪及女衣食婚嫁俱以身任居官清慎廉
明居鄉和平敦厚時論雅推之年八十餘入鄉飲數次

高圻字化圻任巴州錄事居官清慎處鄉和平舉飲賓一次

以上
舊志

趙綬字方來庠生樂善好義壽登八十五歲邑令給匾旌獎

高輝字大光庠生生於天啓六年卒於康熙五十二年享壽九十二歲身見曾元邑令旌其門曰五世一堂子光縉壽登九十歲孫銑壽登八十六歲曾孫其節現年八十二

蘇如高字子昂庠生謹厚誠懇勤學不倦壽八十六歲

趙國寧字乾化庠生現年八十三樂善好義遇事敢爲矍鑠之槩雖中年罕其匹焉

孫振字子玉壽登九十二歲襄城劉都閘給匾旌獎由吏員選四川南部縣主簿未任而卒

張嘉賓國學生賦性仁慈施予不倦恤人之災拯人之危一時稱爲

長石亭壽八十八歲

趙雲栢字逸叟增廣生現年九十歲步履康健神明不衰沉靜恬退之度鄉里奉爲典型

趙王繡邑庠生字君榮現年八十三

以上馮永祚採訪

陳發新字聖託庠生讀書砥行鄉里推重壽登八旬乾隆元年邑令延爲飲賓

蘇瑞榴字百子庠生皓首窮經孜孜不倦晚著唐詩索隱壽登八十

一歲

劉沅字公淑附監生和平忠厚邑人咸敬重焉壽登八十歲

劉益字煥東醇樸無華一鄉稱善現年八十三 恩賜八品頂帶

劉廣字天居太學生天性忠厚與人交以誠邵陽副榜秦煥祖携家
商於鄭與廣及王賜彤交厚俄而煥祖遭疾廣親視湯藥久而不
懈及卒囊無餘貲廣爲含殮復出金贖其妻子俾子國棟與王賜
彤護喪歸葬邑令賀公有德於鄭卒官後貧不能歸廣周卹甚至
現年八十二身見曾元五世一堂康強和怡猶如少年云

喬繼儒字旭公增生品端學優一時從遊者多所成就壽登八十六
弟謙禮字履若任安徽鳳台縣典史以廉著壽登八十七

以上蔡
相採訪

白爾謀字獲野天性忠厚操守端正壽登八十四歲

張士喆字明遠庠生居鄉以厚德稱友教四方多所成就壽八十四

劉曰燦字季光廩監州同敦宗壯烈壽登八十四歲

王錫珍字晉九弱冠遊庠博通書史弟子從遊者甚衆晚年助修邑志至於篤本支敦鄉誼扶危濟急尤爲人所稱壽登八十二歲

王睦字季公國學生壽登八十二歲邑令給匾旌獎

李昭字公璧國學生現年八十八素究醫術施藥濟人歷四十餘年

未嘗取值邑令給匾旌獎

以上王琳採訪

趙允斌字班如庠生賦性醇樸敦品力學壽登八十四歲

高建業字道展庠生行誼端方望重里黨壽登八十八歲

張汝翼字翊宸庠生壽登八十九歲

柴順生庠生現年八十三

王元成現年九十六

蔡鉅字子剛太學生孝友仁慈素好施予濟困扶危親族多蒙其惠

壽登八十有四邑令給匾旌獎

以上高
岱採訪

左良璩字聖行壽八十歲曾於乾隆四年十一月捐銀八十兩五年

三月捐穀百石賑濟鄉里撫憲雅給匾旌獎

及新浴
採訪

馮際用字世福庠生好義樂施鄉里皆稱其德壽登八十七歲子淵
壽八十一歲兩事繼母以孝聞

馮君卜字枚臣庠生博學工書畫助修邑乘壽登九十七歲

戴璲字居一庠生孝友仁慈族弟璐乳哺時家貧欲不舉璲急爲收

養撫育如子既長割產資給之壽登九十二歲

以上馮大
興採訪

李肯堂字象賢庠生精明強固傲岸不羣現年八十三猶應科歲試

蒲仁字善元壽九十七歲五世同居著六子邑令旌之

馮威字子重庠生壽登八十四歲以上張紹芳採訪

李廣壽登九十九歲 邵廣壽登九十歲

邵德壽登八十八歲 趙玫壽登八十七歲

趙子成壽登八十七歲

趙萬年與妻高氏壽俱八十一歲身見曾元五世一堂以上馮永祚採訪

秦條現年八十五 高采字元白庠生壽登八十四歲

胡應吉字謙六壽登八十四歲以上蔡相採訪

張歸極字居辰父患癰症孝事不怠壽登八十四歲

賈銳壽登九十八歲 劉之銳壽登九十三歲

董成龍壽登九十歲 康鳳現年八十三以上黃思睿採訪

趙輝壽登九十四歲

唐建社現年八十八

馬梓和睦鄉鄰有古人洽比風邑令旌獎壽登八十八歲

以上劉齊法採訪

趙文樸實忠厚壽登百歲

王廷元壽登八十一歲

以上王琳採訪

鄧國政天性孝友勇於爲義嘗拾遺金訪其人還之無德色孫曾濟

濟五世同居現年九十四襄城令給匾旌獎

楊九鵬字萬程篤孝友尚婦睦人以長者稱之壽登八十三歲

鄭照字明遠質樸淑慎壽登八十五歲

鄧國祥現年八十四

劉忠厚誠實壽登九十五歲

郭福樸直誠篤壽登八十八歲

馮夢揚德性純篤壽登八十四歲

馮瑚勤儉慈讓四世同居壽登八十五歲

時陸盛壽登八十二歲

時運盛壽登八十一歲

時彩壽登八十二歲

楊如棫壽登八十二歲

以上馮大興採訪

以上三十人俱蒙 恩賞

趙王曜字中天 恩賜八品農政壽登八十五歲

趙王綬字公佩 恩賜八品農政壽登八十三歲

白太質壽登九十二歲 武昌字世芳壽登八十七歲

趙王澤字愷若少質直以孝弟力田爲務三兄相繼病歿兩姪又亡

所遺孤兒寡婦煢煢無依王澤收與同炊教育諸孤爲之經營田

畝無毫髮私密邑錢姓負債過期鬻女以償王澤聞之立返所鬻

之價趣還女而焚其券子良臣膺丙辰鄉薦官上蔡教諭諸孫濟

濟人以爲積德之報也壽登八十六歲卒

王吉士字翹飛母病嘗割股以進與兄析箸以姪衆多讓腴田不少
惜壽至八十五歲

趙朝準現年九十一屏居具茨山下康強和怡有隱者風
以上馮永祚採訪

張四岳現年八十七

王選現年九十二

王吉生現年九十三

高竣字嵩若庠生壽登八十五歲

李文彪工醫術愈人之疾不計其值享壽八十六歲身見曾元五世

一堂邑令給匾旌獎

以上王琳採訪

賈成寬年垂八秩猶能身親農事邑令給匾旌曰極媿先疇壽至九

十二歲

劉齊法採訪

孫夢賦性寬和持身有法與妻樊氏俱年九十六黃髮齊眉世所罕
見邑令給匾旌獎

趙桐壽登九十一歲

劉新昌享壽一百一歲

馬曰祚壽登八十四歲

司如栢字若周壽登九十歲

馮君環壽登八十三歲

馮際時字宴宇壽登八十三歲

馬重壽登八十三歲

張宗良字美士壽登九十四歲

馮環壽登八十歲

馮有美壽登八十一歲

楊泮字聖域淳厚篤實孫曾濟濟數十餘人壽登八十九歲

戴如嵩壽登八十歲

曹克仁壽登八十歲

曹傑壽登八十歲

李建業壽登八十歲

劉宗賢生於崇正四年務本力農恤孤憐貧鄉里稱為善人壽登九十七歲

馬國儉好善樂施所居隣朝河夏秋水漲行旅多阻國儉倡修石橋所費不下百餘金暑月施茶於道以為常壽登八十九歲子名儒壽登八十二歲孫文錫現年七十八

陳瑾字懷玉忠厚和平身見曾元五世一堂現年九十一

王大賢現年八十一

馮純現年八十四

司洵字子實與妻王氏俱現年八十一

馮煒現年八十二

以上馮大興採訪

吳班字瑞玉為人質直壽登八十七歲

公同入壽謹老成居鄉以厚德稱現年八十九以上馮嵩生採訪

劉敬修字寅廸善屬文為諸生八次冠軍問字者遍鄰邑雍正七年

膺制府田公薦任蒲臺縣丞居官清慎歷署泰安州州同蒲臺縣

知縣致仕年八十三卒劉齊法採訪

高秉禮字天秩淳謹老成孝弟力田壽登八十二歲

黃思明現年八十八范嶼現年八十四以上黃思府採訪

王道壽登九十三歲邑令給匾旌獎蒲振邦採訪

陶萬邦賦性孝友樂善好義現年八十五

喬大生字天培有兄三人大生尤以孝著父克讓卒所遺祖殖無多

兄弟析箸一切莖親之具皆大生獨任之晚節衣食家頗裕而諸

兄貧如故乃數與諸兄田有至三十四畝者撫次兄孤淳成立與
己子無二壽八十二歲子五人銘土皆入邑庠次子炳亦列成均
相洙皆能繼父志焉

以上反新
浴採訪

王應貞字會侯廩生壽登九十六

王廷亮壽登八十二

王之倫壽登百歲邑令許朝柱旌

以上馮大
興採訪

靳三元字聯中樂善好施乾隆四年邑遭水患出糴糧百餘石減價
以饗饑民獲濟邑令陳府守董撫軍雅皆旌之壽八十三歲

穆清貴字仙客嚴正自守孝友克敦壽登八十五歲

以上蔡
相採訪

新鄭縣志卷之十八終

新鄭縣志卷十九目錄

人物志七

隱逸

周

鄭長者補

弦高

鄭賈人補

師筏補

師慧補

壺邱子林

列禦寇

漁父舊志列流寓

宋

楊僕

金

傅伯祥補

畢固補

趙素補

明

高務滋補

高翼之補

國朝

王勳昌

高則謙

白灼

流寓

周

季札補

趙武補

韓起補

伍舉補

秦

王翦補

唐

盧照隣補

白 璠補

宋

吳 育

黃庭堅補

晁說之弟冲之補

朱

升舊志作隱逸誤

金

許 通

元

李 孟補

明

辛自修補

王 金補

國朝

卷十九

人物志

目錄

二

王九式

增

郝明有

增

仙釋

上古

大隗真人

黃蓋童子

補

唐

普願

補

宋

文質

補

張潤子

明

宋俊

性空

補

馬進朝

新鄭縣志卷之十九

人物志七 隱逸

邑之士如鄭長者壺邱子林以之稱肥遯其庶幾哉他若弦高之隱于賈師筏師慧之隱于樂官漁父之隱于漁非所謂隱于市朝者歟而列禦寇抱絕世之才居鄭圃四十年無知者及官遺之粟而不受忍饑著書以歿世爲尤多焉宋楊樸以下皆賦性峻潔蓋聞風而興者矣萃而著之亦泉石之光也作隱逸傳

周

鄭長者亡其名莫淑真隱傳鄭長者隱德無名著書一篇言道家事韓非稱之世傳是長者之辭因以爲名今按韓非子外儲說鄭長

者有言曰夫虛靜無爲而無見也

見王

弦高者鄭人也鄭穆公時高見鄭爲秦晉所逼乃隱不仕爲商人及
晉文公之返國也與秦穆公伐鄭聞其都鄭人私與秦盟而晉師
退秦又使大夫祀于等三人成鄭居三年晉文公卒襄公初立秦
穆公方強使百里西乞白乙帥師襲鄭遇周反滑鄭人不知時高
將市于周遇之謂其友蹇他曰卽行數千里又數經諸侯之地其
勢必襲鄭凡襲國者以無備也示以知其情也必不敢進矣於是
乃矯鄭伯之命以十二牛犒秦師且使人告鄭爲僎祀于亡奔齊
孟明等返至都晉人要擊大破秦師鄭于是報高而存鄭公以
存國之賞賞高而高辭曰詐而得賞則鄭國之政安爲曰而無

信是敗俗也賁一人而敗國俗智者不爲也遂以其屬徙東夷終

身不處見高士傳

賈人不知其名晉荀偃之在楚也鄭賈人有將寘諸褚中以出既

謀之未行而楚人歸之賈人如晉荀偃善視之如實出已賈人曰

吾無其功敢有其實乎吾小人不可以厚誣君子遂適齊見左傳成公三

年

師役師慧皆鄭樂官之著者鄭尉氏司氏之亂其餘盜在宋鄭人以

子西伯有子產之故納賂于宋以馬四十乘與師役師慧三月公

孫黑爲質焉司氏子罕以堵女父尉翩司齊與之良司臣而逸之

託諸季武子武子實諸卡鄭人臨之三人也師慧適宋與將私焉

其相曰朝也慧曰無人焉相曰朝也何故無人慧曰必無人焉若
猶有人豈其以千乘之相易滯樂之矇必無人焉故也子罕聞之

固請而歸之

見左傳襄公十五年

壺邱子林者子列子之師也子列子學於壺邱子材壺邱子林曰子
知持後則可言持身矣列子曰願聞持後曰顧若影則知之列子
顧而觀影形枉則影曲形直則影正然則枉直隨形而不在影也
伸任物而不在我此之謂持後而處先時有神巫自齊來至於鄭
命曰季咸知人死生存亡禍福壽夭期以歲月旬日如神其人見
之皆避而走列子見之而心解曰以吾壺邱子曰始吾以夫子
之道爲至矣則又有至焉者矣壺子曰吾與女聞其文未聞其實

而固得道與衆雌而無雄而又奚卵焉而以道與世抗必信矣夫
故使人得而相汝嘗試與來以予示之則曰列子與之見壺子出
而謂列子曰譖子之先生死矣弗活矣不可以旬數矣吾見恆焉
見濕灰焉列子入涕泣沾衾以告壺子壺子曰向吾示之以地文
萌乎不震不正是殆見吾杜德幾也嘗又與來明日又與之見壺
子出而謂列子曰幸矣子之先生遇我也有瘳矣灰然有生矣吾
見杜權矣列子入告壺子壺子曰向吾示之以天壤名實不入而
幾發於踵此爲杜權是殆見吾善者幾也嘗又與來明日又與之
見壺子出而謂列子曰子之先生坐不齊吾無得而相焉試齊將
且復相之列子入告壺子壺子曰向吾示之以太冲莫朕是殆見

吾衡氣幾也觀旋之潘爲淵止水之潘爲淵流水之潘爲淵濕水
之潘爲淵沃水之潘爲淵洿水之潘爲淵雍水之潘爲淵汙水之
潘爲淵肥水之潘爲淵是爲九淵焉嘗又與來明日又與之見壺
子立未定自失而走壺子曰追之列子追之而不及反以報壺子
曰已滅矣已失矣吾不及也壺子曰向吾示之以未始出吾宗吾
與之虛而猗移不知其誰何因以爲茅靡因以爲波流故逃也然
後列子自以爲未始學而歸三年不出爲其妻饔食孺如食人於
事無親雕琢復樸塊然獨以其形立怗然而封戎壺以是終初子
列子好游壺子曰禦寇好游游何所好列子曰游之樂所玩無
故人之游也觀其所見我之游也觀其所變游乎游乎未有能辯

其游者壺邱子曰禦寇之游固與人同歟而曰固與人異歟凡所
見亦恒見其變玩彼物之無故不知我亦無攷務外游不知務內
觀外游者求備於物內觀者取足於身取足於身游之至也求備
於物游之不至也於是列子終身不出自以爲不知游居鄭圃四
十年人無識者

集列子補

按呂氏春秋云子產相鄭往見壺邱
子林與其弟子坐必以年蓋子產同時人也宋王

應麟困學紀聞曰壺
邱子林列子之師

列禦寇鄭人也壺邱子林之弟子與鄭繆公同時蓋有道者也其學
本於黃帝老子號曰道家居鄭圃四十年人無識者國君卿大夫
眎之猶衆庶也國不足將嫁於衛弟子曰先生往無反期弟子敢
有所謁先生將何以教先生不聞壺邱子林之言乎子列子笑曰

壺子何言哉雖然夫子嘗語伯昏瞀人吾側聞之試以告女其言
曰有生不生有化不化不生者能生生不化者能化化生者不能
不生化者不能不化故常生常化常生常化者無時不生無時不
化陰陽爾四時爾不生者疑獨不化者徃復徃復其際不可終疑
獨其道不可窮黃帝書曰谷神不死是謂元牝元牝之門是謂天
地之根綿綿若存用之不勤故生物者不生物者不化自生自
化自形自色自智自力自消自息謂之生化形色智力消息者非
也又嘗曰天地無全功聖人無全能萬物無全用故天職生覆地
職形載聖職教化物職所宜然則天有所短地有所長聖有所否
物有所通何則生覆者不能形載形載者不能教化教化者不能

違所宜宜定者不出所位故天地之道非陰則陽聖人之教非仁則義萬物之宜非柔則剛此皆隨所宜而不能出所位者也故有生者有生生者有形者有形形者有聲者有聲聲者有色者有色色者有味者有味味者生之所生者死矣而生生者未嘗終形之所形者實矣而形形者未嘗有聲之所聲者聞矣而聲聲者未嘗發色之所色者彰矣而色色者未嘗顯味之所味者嘗矣而味味者未嘗呈皆無爲之職也能陰能陽能柔能剛能短能長能圓能方能生能死能暑能涼能浮能沉能宮能商能出能沒能元能黃能甘能苦能癯能香無知也無能也而無不知也而無不能也生乎師老商氏友伯高子進二子之道乘風而歸尹生聞之從列子

居數月不省舍因閒請蘄其術者十反而十不告尹生對而請辭
列子又不命尹生退數月意不已又往從之列子曰汝何去來之
頻尹生曰曩章戴有請於子子不我告固有憾於子今復脫然是
以又來列子曰曩吾以汝爲達今汝之鄙至此乎姬將告汝所學
於夫子者矣自吾之事夫子友若人也三年之後心不敢念是非
口不敢言利害始得夫子一眄而已五年之後心庚念是非口庚
念利害夫子始一解顏而笑七年之後從心之所念庚無是非從
口之所言庚無利害夫子始一引吾並席而坐九年之後橫心之
所念橫口之所言亦不知我之是非利害歟亦不知彼之是非利
害歟亦不知夫子之爲我師若人之爲我友內外進矣而後眼如

耳耳如鼻鼻如口無不同也心凝形釋骨肉都融不覺形之所歸
足之所履隨風東西猶木葉幹殼竟不知風乘我邪我乘風乎今
汝居先生之門曾未浹時而懟憾者再三汝之片體將氣所不受
汝之一節將地所不載履虛乘風其可幾乎尹生甚作屏息良久
不敢復言子列子窮容貌有饑色客有言之鄭子陽者曰列禦寇
蓋有道之士也居君之國而窮君無乃爲不好士乎鄭子陽卽令
官遺之粟子列子出見使者再拜而辭使者去子列子入其妻望
之而拊心曰妾聞爲有道者之妻子皆得佚樂今有饑色君過而
遺先生食先生不受豈不命也哉子列子笑謂之曰君非自知我
也以人之言而遺我粟至其罪我也且又以人之言此吾所以不

受也居一年鄭人殺子陽其黨皆死禦寇安然獨全其後莊周嘗
師之曰列子御風而行泠然善也且述其言作南華經列子著書
二十篇凡十餘萬言名曰冲虛道德經漢劉向爲之較定號曰新
書存者八篇唐天寶元年詔褒封列子號冲虛真人其所著書稱

真經

列子史書無傳今採冲虛經語參劉向別錄補其餘詳藝文經籍二志

漁父鄭隱人也楚平王聽讒欲殺太子建建與伍員奔鄭鄭人禮之
太子建又與晉謀滅鄭鄭定公殺太子建伍員遂奔吳至江江中
有漁父乘船從下方沂水而上子胥呼之謂曰漁父渡我如是者
再漁父欲渡之適會旁有人窺之因而歌曰日月昭昭乎侵已馳
與子期乎蘆之漭子胥卽止蘆之漭漁父又歌曰日已夕兮予心

憂悲月已馳兮何不渡爲事寢急兮當奈何子胥入船漁父知其
意也乃渡之千盞之津子胥既渡漁父乃視之有其饑色乃謂曰
子侯我此樹下爲子取餽漁父去後子胥疑之乃潛身於條葦之
中有頃父來持麥飯鮑魚羹盎漿求之樹下不見因歌而呼之曰
蘆中人蘆中人豈非窮士乎如是至再子胥乃出蘆中而應漁父
曰吾見子有饑色爲子取餽子何嫌哉子胥曰性命屬天今屬丈
人豈敢有嫌哉二人飲食畢欲去胥乃解百金之劍以與漁者此
吾前君之劍中有七星價直百金以此相答漁父曰吾聞楚之法
今得伍胥者賜粟五萬石爵執圭豈圖取百金之劍乎遂辭不受
謂子胥曰子急去勿留且爲楚所得子胥曰請丈人姓字漁父曰

今日凶凶兩賊相逢吾所謂渡楚賊也兩賊相得得形於默何用
姓字爲子爲蘆中人吾爲漁丈人富貴莫相忘也子胥曰諾既去
誠漁父曰掩子之盜槩無令其露漁父諾子胥行數步顧視漁者
已覆船自沉於江水之中矣子胥默然遂行至吳吳王闔廬既立
得志乃召伍員以爲行人而與謀國事遂大興師伐楚爲員報讎
五戰徑至於郢昭王出奔復引軍擊鄭鄭定公前殺太子建而圍
廑子胥自此鄭定公大懼乃令國中曰有能還吳軍者吾與公爵
而治漁者之子應募曰臣能還之不用尺兵斗糧得一枳而行水
道中卽還矣公乃與漁者之子橈子胥單將至當道扣枳而呼曰
蘆中人如是再子胥聞之愕然大驚曰何等謂與語公爲何人矣

曰漁父者子吾國君懼懼令於國有能還吳軍者與之分國而治
臣念前人與君相逢於途今從君乞鄭之國子胥嘆曰悲哉吾蒙
子前人之恩自致於此上天蒼蒼豈敢忘也於是乃釋鄭國還軍

守楚

飾吳越春秋
叅史記補

宋

楊樸字契元世居新鄭東里每騎牛往來郭店自號東里野民博學
能文性癖作詩伏草中冥搜得句輒躍起遇者驚之嘗策杖入嵩
山窮絕處構思成百餘篇士大夫多傳誦與畢士安韓丕劉錫游
士安少同學尤相善士安薦之太宗以布衣召見賦莎衣詩二不
願仕賜束帛遣還作歸耕賦以見志淳化中韓丕爲學士上因召

對問卿早在嵩陽當時流輩頗有遺逸否乃以萬適楊樸田詰對
上悉令召至闕真宗祀汾陰過鄭召樸欲官之問卿來有以詩送
行者乎樸云無有惟臣妻一篇使誦之曰且休落魄貪杯酒更莫
猖狂愛作詩今日捉將官裏去這回斷送老頭皮上大笑厚以金
帛贈之後帝朝諸陵道出鄭州遣使賜茶帛以其子從妙爲長水
尉有東里集行于世卒年七十八塋郭店北袁家隲東北里許墓
前舊立石乃翰林學士知鄭州李淑撰墓表今無存

探蒙齋筆談
叅桐江詩話

諸書
補

金

傅伯祥邑人隱居不仕心喜詩終日吟詠不輟爲人和而介不妄交

遊即達官顯者欲謀一面不得也與衛州詩人胡汲相友善見元

好問中州集

採胡汲傳補
餘詳雜志

因號抱癡子隱居不仕與隣人趙素相友善各以節義相砥終日

惟論詩讀書而已及卒趙素題其墓曰黃涯釣徒泰和甲子為之

立石

見石
刻補

趙素字守一酷嗜墳典不樂仕進自號曰自了漢本宋末名士入金

益高其節遂逃于禪深衣幅巾逍遙世外絕口不言時事年八十

一卒將死語其子曰我豈不樂儒冠耶此中有大不得已在今可

死矣蓋北宋遺民也至今人猶傳為趙蓬頭

採升菴隱
逸拾遺補

明

高務滋字益存中丞提子六齡失怙以孝聞爲諸生學問淵博屢冠
多士雖棘園數躋然好學不倦泊如也萬歷時當寧欲物色之將
予以官終不能致士論重之平居慷慨好義周困濟危不可勝紀
時開府樊獎以學有本源題其門著晰疑操存解年六十八終里
人私謚孝惠先生以子瑞雛贈右府經歷奉政大夫

見石志
隱逸傳

高翼之字惟一明諸生遭亂隱居逃禪以自晦學官逼其應試乃遁
去入伏牛山窮絕之境經數日困餓幾殆家人蹤跡得之歸遂佯

狂繡佛以終焉

採家
乘補

國朝

王勲昌以明經著性篤學門多俊傑安貧不仕晚年益甘淡泊日與

父老追進璽曲經年不入城市鄉人高之

見舊志

高則謙字景抑文襄公孫頴敏嗜古居家孝友處交遊坦懷磊落無富貴氣亦不以得失介懷順治二年拔貢後隱居不仕賦詩養靜以終其身

見舊志

白灼字孔昭羽介敦樸與修邑乘博古能文順治二年選拔貢生獨冠八郡性澹泊不樂仕進晚更誦法先王杜門不出市人鮮有見

其面者

見舊志

流寓

予讀史至庾信傳朝廷通好南北多流寓之士未嘗不嘆鄭之
先皇華之煩焉然有客若吳公子者蓋不一二見之矣外則趙
武韓起相繼燕樂皆雍容以詩禮相讓洵嘉賓哉昔蘭亭修禊
一會多寓賢放翁會稽志載之爰引其例而見之史傳者仍次
第著于篇作流寓傳

周

季札號延陵季子吳王壽夢少子也襄公二十九年聘於鄭見子產
如舊相識與之編帶子產獻紵衣焉謂子產曰鄭之執政侈難將
至矣政必及子子爲政慎之以禮不然鄭國將敗遂去鄭適衛

見左

補傳

趙武晉大夫夙之後衰曾孫衰子盾盾子朔武父也襄公二十七年

鄭伯享趙孟子垂隴子展伯有子西子產子太叔二子石從子展

賦草蟲子西賦黍苗子產賦隰桑公孫段賦桑扈伯有賦鶉之責

賁子太叔賦野有蔓草印段賦蟋蟀

原文見左傳今從陶淵明羣輔錄黍傳補左傳及昭公元

年鄭伯享趙武事並載藝文志

韓起晉大夫厥子無忌弟也昭公十六年二月韓起聘于鄭鄭伯享

之四月鄭六卿餞宣子于郊宣子曰二三君子請皆賦起亦以知

鄭志子齋賦野有蔓草子產賦鄭之羔裘子太叔賦褰裳子游賦

風雨子旗賦有女同車子柳賦擗兮宣子皆獻馬焉而賦我將

同上

伍舉楚大夫也初楚伍參與蔡大師子朝友其子伍舉與聲子相善
也伍舉娶于王子牟王子牟爲申公而亡楚人曰伍舉實送之伍
舉奔鄭適奔晉聲子將如晉遇之於鄭郊班荆相與食而言復
故聲子曰子行也吾必復子及歸與令尹子木言諸王益其爵祿
而復之聲子使椒鳴逆之昭公元年春楚公子圍聘于鄭且娶于
公孫段氏伍舉爲介將入館鄭人使行人子羽與之言乃館於外
既聘將以衆逆子產患之使子羽辭之伍舉知其有偶也請垂綦
而入許之封于椒亦名椒舉

錄左傳補

伍員舉孫奢子也世爲楚大夫費無極讒於王執伍奢殺之并殺其

兄尚員同太子奔鄭後如吳

採吳越春秋補

秦

王翦頻陽東鄉人也秦始皇二十一年王賁攻薊乃益發卒誦王翦軍遂破燕太子軍取燕薊城得太子丹之首燕王東收遼東而王之王翦謝病老歸新鄭反昌平軍徙於郢大雨雪深二尺五寸二十三年秦王復召王翦彊起之使將擊荆取陳以南至平輿虜荆

王節史記秦
始皇本紀

唐

盧照隣字昇之范陽人博學善屬文授鄧王府典籤調新都尉因染大風疾退處太白山得方士元明膏餌之會父喪號嘔丹輒出由是疾益甚足攣一手又廢乃去其茨山下買園數十畝疏陂水周

舍復豫為墓偃卧其中照隣自以當高宗時尚吏已獨儒武后尚
法已獨黃老后封嵩山屢聘賢士已已廢著五悲文以自明病既
久與親屬訣自沈潁水

節唐書文苑傳補

白錦居易之祖也其先太原人後徙居新鄭敦儒業以明經出仕歷
醴陵二縣多善政及去民尸祝之以大歷八年卒於新鄭里居

子五長曰季庚歷官襄州別駕季庚生居易是為香山先生

採白氏世

系及香山

年譜補

宋

吳育字春卿建安人也少奇穎博學舉進士試禮部第一中甲科累
官至右諫議大夫樞密副使踰月轉叅知政事育在政府遇事敢

言與宰相賈昌朝數爭議上前左右皆失色育論辨不已乃請曰
臣所辨者職也願力不勝願罷臣職乃復以爲樞密副使未幾出
知許州徙蔡州河南陝州永興召兼翰林侍讀學士以疾辭且請
便郡帝語大臣曰吳育剛正可用第嫉惡太過耳因命知汝州復
知陝川進資政殿大學士召還判尚書都省帝數欲大用爲諫官
劉元瑜誣奏育在河南嘗貸民出息錢久之除宣徽南院使應延
路經畧安撫使進尚書左丞知河中府徙河南卒年五十五贈吏
部尚書諡正肅育性明果所至作條教簡疎易行而不可犯事
不妄發發卽人不能撓辨論明白使人聽之不疑晚年在西臺與
宋庠唱酬追裴白遺事至數百篇有集五十卷

節宋史本傳按
正肅公堉其父於

新鄭文
新鄭志
新鄭縣志
新鄭縣志

黃庭堅詩後直山谷老人江西分寧人崇寧二年嘗寓新鄭居郭

店之保安寺愛其地幽僻爲植蘭蕙於東西牖題其居曰清深軒

日吟詠其間及赴宜州甚愛之特作封植蘭蕙手約付寺僧文質

守之而去採山客文集補

晁說之字以道濟州鉅野人端彥之子自號景迂生元豐五年進士

蘇軾以著述科薦官至徽猷閣待制寓居邑之具茨山下一日在

太學見朱弁之詩奇之與歸新鄭妻以兄女晁氏多寓鄭邑而說

之與冲之其最著焉生平著有景迂生集節本傳參宋史朱弁傳補

晁冲之字叔用初字用道濟北人說之從弟舉進士與陵陽喻汝礪

爲同門生紹聖初黨禍起羣從多在黨中被謫逐遂飄然棲遁于
具茨之下號具茨先生十餘年後重過京師憶舊游作無題詩二
首爲時所傳時諸公謀欲用之高挹不顧至疾草取平生所著曰
是不足以成吾名悉焚之故其詩不多呂紫微位之江西派中有

具茨集傳世

節宋詩
鈔本傳

朱弁字少章婺源人少穎悟讀書日數千言旣冠入太學見說之見
其詩竒之與歸新鄭妻以兄女新鄭介汴洛間多故家遺俗弁遊
其中聞見日廣靖康之亂家碎于賊弁幸歸建炎初議遣使問安
兩宮弁奮身自獻詔補修武郎借吉州團練使爲通問副使至雲
中見黏罕邀說甚切黏罕不聽便就館守之以兵紹興二年金人

世于文虛中來言和議可成當遣一人詣元帥府受書還虛中欲
遣王倫探策決去留弁曰吾來固自分必死豈應今日先
歸卿王使受書歸報天子成兩國之好蚤申四海之養於兩宮則
吾雖棄骨外國猶生之年也倫歸弁乞使印懷之卧起與俱金人
迫弁止劉豫弁曰豫國賊吾恨不食其肉又忍北面臣之吾有死
耳金人怒絕其餽遺以困之弁固拒驛門忍饑待盡不爲屈金人
亦感動致禮後復欲易其官弁誓死不從以書與洪皓訣曰殺行
人非細事吾曹遭之要當舍生以全義爾又與被掠諸人語曰吾
畢命報國諸公其瘞我題曰有宋通問副使朱公之墓幸矣衆皆
泣下金人知其不可屈遂不復強十三年和議成弁得歸賜金帛

甚厚補官易宣教郎直秘閣檜沮之卒著有聘遊集曲消舊聞續

懋懋說新鄭舊詩諸書

節宋史本傳 按舊志載聘遊于於隱逸傳中而不詳其名且于朱公大節未著故

節錄史傳以補之

金

許通其先河內人避亂居新鄭隱德弗耀後以子貴贈銀青榮祿大

夫大司徒追封魏國公諡惠和配李氏追封魏國夫人子二衡衡

衡即魯齋先生家傳云衡字仲平行一號魯齋金泰和九年己巳

生于新鄭邑之大隗山陽緩里後其門人鄭冲霄為邑人建祠於

縣治至今春秋祭祀不絕餘詳祠祀及藝文志中

按魯齋先生

一代名儒道德文章為海內所宗仰况降生之地可不詳載及之乎然究係河內人舊志載作邑人未免過實今改入流寓至先生

之傳自有因史在
不放借光贅見焉

元

李孟字道復潞州上黨人七歲能文通貫經史授徒於家遠近爭從
之時武仁二帝皆未出閣求名儒輔導有薦者曰布衣李孟有宰
相才宜令爲太子師大德初武宗撫軍北方孟侍仁宗於宮中進
講多所裨益仁宗爲皇太子侍內宴飲半忽戚然改容帝顧語曰
吾弟何故不樂對曰賴天祖之靈神器有歸然成今日母子兄弟
之歡者李道復之功爲多適有所思不自知其見於色耳帝感其
言命搜訪之得於許昌陘山召見玉德殿授中書平章政事同知
樞密院事延祐間封韓國公

節續宏簡
錄宰輔傳

明

辛自修字子吉號慎軒襄城人由進士累官工部尚書予告歸卽隱

具茨之山築一圃讀書其中足鮮及城市市廛三畝田中所入足

餬口而已終不求益獨語及濟世利物移風易俗事則竭蹶而趨

之若渴也卒贈太子少保諡肅敏

見沈鯉撰辛公墓誌銘 按具茨山下尚有故址相傳爲辛尚

書墳者或卽其舊隱居處謠傳之爾

王金號芝山秦之西安人當世廟時以白衣召見爲言三元大丹輒

稱旨授官太常世廟賓天廷議以金進藥不謹論極刑時新鄭相

國高文襄公以首輔掌銓復疏力救其畧曰先帝壽考令終古今

無比今謂是金等所害皇天后土然耶否耶如以爲不得正終其

將謂先帝爲何如以父子之間而使先帝不得正終其將謂陛下爲何如疏上如其議乃得論戍金至戍所數年釋歸晚依文襄以居遂爲鄭人臨歿屬其子懷芝曰爾父以方術賈禍汝其慎之嗣後懷芝隱于醫懷芝之歿也復以屬其子繼懷後遂以醫世其家云

國朝

王九式字抑之山西高都人本朱姓明之宗室也遭亂無家來寓於鄭素精秦越人術爲人療病輒觸手愈然多不取值饔飧不給宴如也篤嗜吟咏舉所遭身世流離之感皆於聲律發之故雖不必盡合體格而沉深有思致讀者多悲其志焉著有晚牕詩集數卷

藏於家

郝明有字素之山西屯留人年十七來新鄭貨麵及麵性好施予積
久無吝色閭邑皆以善人稱嘗于城南楊家河獨修木橋以利行
人雍正乙卯冬有數瞽者寄居三皇廟凍餒幾死賴明有得活乾
隆己未夏霖雨浹旬麵價騰貴明有麵既盡乃併所積麵材百餘
斤減價以應邑侯陳給匾褒獎復詳憲立彰善坊以旌之子璋今
入邑庠

仙釋

遷固不爲仙釋立傳後漢書乃統名之曰方術魏書則于釋老別爲之志元史列傳竟分爲二唐荆川左編因之縣固有大隗山黃帝曾問道於此牧馬童子其首著焉釋氏不多見其見于五燈會元者乃趙州之師實高僧也合而書之已足傳矣又何多爲哉作仙釋傳

上古

具茨有大隗者卽上世之泰驪氏也能設於無垓之宇而遊於泰清訪之者多迷其塗焉襄城有神牧者牧馬童子也得七元六紀三綱之法

見四極明科

能知具茨之山又知大隗之所存是之謂天師

莊見

子

鴻隄有黃蓋者陽城之童子也得神芝之道永爲童子而不老

水經注云

黃帝登具茨之山升於鴻隄受神芝圖於黃蓋童子今新鄭縣西南有具茨山上有黃帝避暑宮

唐

池州南泉普願禪師者鄭州新鄭人也姓王氏幼慕空宗唐至德二年依大隗山大慧禪師受業詣嵩嶽受具足戒初習相部舊章究毗尼篇聚次遊諸講肆歷聽楞伽華嚴入中百門觀精練元義後扣大寂之室頓然忘筌得遊戲三昧一日爲衆僧行粥次馬祖問桶裏是甚麼師曰這老漢合取口作恁麼語話祖便休自餘同叅之流無敢詰問貞元十一年憇錫于池陽自建禪齋不下南泉三

十餘載大和初宣城廉使陸公巨禰師道風遂與監軍同請下山
仲弟子之禮大振元綱自此學徒不下數百言滿諸方目爲郢匠
師示疾告門人曰星翳燈幻亦久矣勿謂吾有去來也言訖而逝
趙州從諗禪師鄂州茱萸山和尚宣州刺史陸巨皆其法嗣

採五燈會

補元

宋

文質保安寺僧也頗精禪理山谷老人黃庭堅寓新鄭常主之於東
西窓外封植蘭蕙西蕙而東蘭名之曰清深軒及去以蘭二本重
八本付文質守之并書封植蘭蕙手約以記且曰士大夫欲遷而
去者可以此券示之約載藝文志

採山谷集補

卷十九

人物志

仙釋

七

張潤子新鄭人少耽元學結菴於縣西興福寺前遇至人授以煉精服氣之術棲真四十餘年於宋政和間仙去舊有升仙臺今廢見舊志

明

宋俊新鄭人幼有異質比長不樂婚娶出俗爲僧住持縣南觀音寺聚徒演教戒行精嚴永樂中以高僧徵入京度陣亡戰士推俊爲懺首賞賚甚厚適襄王之國獨請俊隨高僧爲弟子者百餘人悉偕以行王錫承天寺田二十頃示寂時年百餘荼毘之際有舍利數枚王貯以金塔夜有光明後宮中火失舍利所在惟金塔存焉

見府志

性真東里高氏子年十九於興福院投師落彩恪守戒節與同學計
大乘山禮真空和尚示以萬法分宗之旨性空精勤不怠過中不
食因隨板負薪忽然頓覺有頌曰因地一聲方知不空山河大地
全露法身後詣寶岩舉似岩云子既如是善自護持勿令放逸授
其徒明全拂子爲助道之信自是復回天麻山卓錫千日緇素參
叩發明者不可勝記于成化己丑秋語門徒曰吾歸去矣弟子流
涕因請乃書偈曰法性非生滅着相妄分別返本還源去雲散一
輪月言畢端坐而逝

節明全僧所撰塔記補

馬進朝新鄭人中年去妻子結廬大隗山辟穀不食每至數月繼王
欲訪之進朝已先知避去不知所往後六十餘年爲黃冠乞食其

家遺一瓢去其子憶爲父舊物追之無及矣

見府志

新鄭縣志卷之二十

人物志八 列女

昔漢劉向撰列女傳宋曾鞏序述其意尤精且詳朱子嘗亟稱之新鄭素多淑媛其以節烈著者自晉楊經之母與宋張晉卿妻已傳芳竹素矣至

昭代

旌表所及視昔爲尤渥焉綜厥懿行以彰風教豈僅推闡子政子固之訓指也哉作列女志

晉

鄭氏楊潭妻光祿勳密陵成侯之元女生子經才八齡潭卒氏操行

甚高恤養幼孤以保父夫家而免諸艱難經以知名于時經傳載

人物

採潘岳楊仲武詩補

宋

丁氏張晉卿妻文簡公五世孫靖康中與夫避金兵於大隗山爲金兵所獲挾之馬上丁自投於地戟手大罵連呼曰我死卽死誓不受辱復挾上馬再三罵不已卒忿然舉槌縱擊死杖下

採曲洧舊聞并宋史

明

王氏李大妻年十九歸大大歿哭之慟誓與夫同死家人防之候夜半防者就寢卽自縊死

竇氏王三妻年十八適三三歿河役骸骨且至氏乃以銀釵賄工囑

作棺令大及歛哭幾絕家人覺守甚嚴居三日防者稍怠卽自縊
遂合棺葬焉

王氏王璠女許字生員高永祿未婚而祿卒女聞之不食旬日死遂
合壙以葬

穆氏及琳妻正德六年流賊壓境穆被掠欲污之穆大罵曰吾寧死
不受辱賊怒殺之事聞旌表

李氏高垣妻年十九夫故無子誓死不二堅若金石辛巳冬聞闖賊
克炤哭泣數日不食死

端氏高文光妻年十六夫亡淚滴皆血孝事孀姑二十年不踰閭不
歸寧及避難高家砦砦將破投井而死

孫氏孫禮女年十四未字流賊斷其十指終不受辱死

以上見省志

喬氏高翥妻翥早卒喬誓堅守撫育二女長而擇配氏獨紡績自給苦志不渝

張氏李宗妻適宗生一子甫匝月宗亡張哭幾喪明撫子自守年七十卒

王氏劉恕妻年二十適恕甫三月恕以雲南軍補伍去尋凶訃王哀毀過禮誓不再適綜理家事以奉姑嫜終不少怠

張氏庠生鹿璉妻適璉生二子璉死張年甚少躬勤紡績米幾二子繼殞子然寡居縫紉度日邑宰憐其苦月贈米三斗一夕隣火將及其屋隣婦促避氏終不出第曰死耳死耳頃之火熄親戚問故

乃曰我一婦人可昏夜投人乎年九十二終

丁氏郭相妻適相生一子相死丁撫子長成爲娶婦俄子婦俱死煢
煢孤苦貞節自誓年八十餘終

王氏李鶴妻鶴早喪氏撫遺孤守節嚴肅年九十餘終

丁氏邑庠生韓廷才妻早寡紡績自給志行不渝有司匾曰貞節可
風

薛氏曹鉞妻生一子鉞卒治家謹嚴育孤成立終身無間有司匾曰
貞節

范氏宋璋妻年十八適璋生二子璋亡長子三歲次甫六月家甚貧
紡績自給勵志守節年八十五終

劉氏沈華妻適華生二子華卒氏年二十餘誓不更適躬勤紡績年八十餘終有司匾曰節婦

趙氏庠生郭楠妻夫亡氏年方十七遺腹得男教育成名孫二皆遊庠苦節六十餘年有司旌曰貞節

劉氏國子生高孟男妻生一子夫亡時年二十一勵志自守後子亦亡苦節愈堅歷三十五載有司旌之

劉氏董守魁妻年二十二夫亡撫孤守節誓無他志子長娶婦唐氏子亦早歿姑媳共守奉旨旌曰一門雙節

劉氏幼歸庠生陳三策克盡婦道事舅姑以孝聞策蚤歿氏茹苦育孤訓迪入泮有司上其事奉旨旌曰貞節

張氏國子生高國彥妻夫歿斷髮毀容誓無二志立姪爲嗣力訓成名年七十邑人上其事旌之

郭氏劉光文妻生四子文早卒郭廿六歲後三子相繼亡其媳張氏董氏唐氏偕守無二志一門四節皆郭風之也

劉氏趙瑤妻瑤逝氏年二十家貧堅守訓子若孫皆入泮年八旬終有司匾曰堅節

張氏邑庠生劉起鶴妻鶴亡氏年十九生一子方三歲矢志靡他教子食廩於庠後子又亡與媳趙氏相依堅守撫孫成立咸列子衿家聲轉振有司匾其門

唐氏廩生馮昌宗妻十六歲適宗宗亡遺二孤皆幼堅守志節躬勸

紡績後二子次第入庠有司匾曰貞節不隕

李氏韓清妻清亡氏方廿四勵志守貞孝奉舅姑訓子遊泮年八十
壽終

邢氏劉邦俊妻年十六俊亡遺子二歲甘貧苦節壽八十餘終

趙氏王鵬妻鵬亡年廿七堅貞茹荼二子長曰漳庠生蚤亡漳妻李

氏年十八夫婦相依稱一門雙節云

以上見府志

毛氏廩生劉宗源妻孝廉毛節女適劉孝養孀姑相夫誦讀夫亡氏

甫廿齡守志撫孤躬執勤苦年僅三旬皤然皓首邑令陳公采入

邑志旌曰貞烈維風方伯韓公匾曰冰霜節烈直指邱公具題請

旌壽七十五子樸楷爲庠名士楨以拔貢歷任黎平太守自有傳

諸孫乙榜明經不絕人謂苦節之報云

見舊志

閻氏崇生毛健妻健亡氏方廿六哀毀過禮誓無二志治家嚴肅孝姑訓子致孝

李氏庠生劉材妻年十五歸材生二子方三歲材卒氏年廿四孀姑在室歷盡艱苦三十年如初

范氏馮裕妻年十六歸裕事姑以孝聞祿死有妊堅貞不渝果舉男撫育成立

李氏端國柱妻柱亡氏年二十撫育二子事姑以孝聞冰蘖自勵人無間言

陳氏沈誥妻年十四歸誥生一子誥亡氏年十六矢志自守貧且益

堅子亦成立垂四十年如一日

樊氏白好問妻年廿五夫亡乏嗣以姪承祧孝姑撫嗣守志終身士民公舉邑令樊曰貞節維風

鄭氏生員高務若妻年十九夫殞乏嗣誓以身殉姑力救得免苦守三十餘年竭力奉姑謀繼弗遂憂鬱成疾而卒郡守唐公旌曰節苦栢舟邑宰楊公旌曰節孝雙全

高氏師爾悅妻庠生高務正女十九歲夫亡以姑在堂苦守盡孝十餘年姑歿哭哭無告依母家紡績自給年五十餘而終

劉氏楊華妻華病篤謂劉曰我死汝當何如氏泣曰以死相從誓靡他也華卒遂自縊死有司給銀葬祭匾曰貞節

劉氏字中牟庠生崔紹芳年十八夫逝飲泣三日夜縊死兩縣交
上其事旌曰烈婦立祠肖像焉

李氏庠生牛應柱妻柱亡氏方姪及產生女氏大慟絕望遂縊死時
年未二十

蘇氏三女長十八次十六俱在室一夕火起家人俱駭竄二女自謂
虞子不可夜出須與火至俱焚死

李氏廩生唐寬妻 王氏馮國彥妻 仝氏生員楊名世妻

張氏生員高克允妻 翟氏楊旋妻 荀氏生員吳紹泰妻

劉氏生員馮三賓妻 黃氏馮三元妻 毛氏生員馮三章妻

以上俱崇正年間流
婦人節不汚而死者

毛氏生員李應祝妻

王氏生員陳亦衷妻

陳氏生員高祚昌妻

甘氏生員秦鉢妻

楊氏馮三傑妻

以上俱崇正年間流寇入鄭與夫同死節者

陳氏生員陳亦衷二女

亦同死冠難者以上見邵府志

國朝

吳氏張四維妻夫故子亦亡砥志撫孫時光祖甫七歲卽命就外傳

慈嚴備至臨終呼光祖告曰爾祖父積德累善汝宜有以光大之

勿負吾望光祖涕泣受命己丑成進士由恩縣令歷仕至兵部督

捕郎中兩典蜀試所在以廉介和嘗曰余非祖母無有今日行已

居官罔敢任情懼負吾祖母遺教也吳壽至九十五終

呂氏庠生高則明繼室適明數月夫歿投繯以救免孝翁姑撫前妻

子女甚慈後遭流寇子女俱亡伶仃孤苦節操愈堅順治十五年
公舉撫軍賈按院李皆旌之

李氏貢生秦鏡妻早寡明末城破家無擔石事姑盡力未幾姑死營
葬盡禮教子得入庠

孫氏朱希賢妻賢故氏年二十餘遇荒遭難節操彌堅紡織教子後
子英秀武捷兩榜氏年逾七旬訓誡尤嚴

李氏高四配妻配死家貧苦守教子成立壽八十餘卒都憲佟旌之
趙氏生員高紹妻紹以土寇遇難氏携幼子避唐家砦孤苦伶仃嘗
曰吾不從夫地下者爲此孤也九熊課子得以成名

劉氏生員唐印鎬妻夫亡年二十五無子欲從死因姑未葬不果乃

紡績殯姑全志婦節之最可矜者

唐氏郭之屹妻屹被賊傷氏方廿四誓同夫死鄰以撫孤勸之氏苦守紡績教子磐得列賢序全節以終

李氏連亮妻嫁二年夫死年廿歲貞節撫孤屢經兵荒勵志如一歷四十一年邑令旌

魯氏生員柳長春妻夫故氏年未二旬孝姑撫幼矢志無渝

劉氏白炳妻炳亡氏年二十五歲止一女守節三十年不渝

楊氏毛士成妻夫故撫前室子如同已出茹苦勤儉教子入學

馮氏閻宗禮妻禮遭寇殺氏年二十四從列翁老子幼中止歷節三十

十餘年不渝

劉氏生員高基妻年十九夫被賊殺子僅月餘氏父貢生劉允元亦
守城氏無可倚寄居夫叔生員高務正家紡績育子子永祐奉
祀文襄公祠

黃氏明義士李崇謙妻崇正年間謙守城殉難氏撫孤力教三子俱
入庠

秦氏劉廷誼妻年二十七夫亡孝翁姑撫幼子建坊 旌表

劉氏庠生柳業先妻年二十餘見夫壯年無子典鬻簪珥爲夫置妾
甫舉子而夫歿劉撫育遺孤守志不渝

高氏明邑庠生柳如韓妻年十八夫被流賊所殺氏隨自縊索斷復
生侍養孀姑喪葬盡禮擇宗人子爲夫嗣邑令旌曰一門雙節

韓氏庠生劉建極妻夫故氏年十七遺孤襁褓勵志守節子年十六娶媳石氏僅歲餘子又歿門無期功姑媳誓死冰蘖凜然邑令旌萬氏庠生李培妻夫早亡氏撫孤文銓歷遇兵荒霜節無改教子入泮娶媳戴氏銓又歿矢志不渝稱雙節里民公舉旌

楊氏張賀妻明末賀爲府椽被土寇所害氏年二十五無嗣守志孝事翁姑教姪世維世經世統悉入膠庠邑令旌年七十二卒

柴氏田佑妻佑故氏年十九欲殉父母勸以遺孤在抱乃止翁姑繼歿夫弟四齡並撫叔姪俱得成立子入武庠勳業公舉旌

康氏王省身妻夫歿氏年十九遺孤月苦守志五猶躬理翁姑服食不肯少怠姑病焚香祝天願以身代里旌公舉旌

劉氏庠生王恒位妻守志待旌

王氏谷秀妻夫亡守志兼病氏割股奉翁尋愈鄉保共舉待旌

翟氏舉人李洵妻守志待旌

劉氏庠生李洵妻守志待旌

以上見府志

陳氏王之秀妻早寡撫子應貴成立娶劉氏復寡姑媳守節四十年
楊氏趙增位妻年十七適位二十而寡欲自縊族黨勸以翁姑年老
叔尚幼遂紡績孝養喪葬成禮守節六十餘年縣令旌

范氏楊名聲妻年二十四夫亡無子矢志守節依伯氏及姪以居未
幾伯氏與姪俱亡氏荼苦益勵營葬數喪撫姪孫如榷入庠壽六
十九以節終邑令旌

馮氏劉爾孜妻年二十夫亡苦志堅守孝養舅姑邑令旌之

郭氏王進科妻科故無子潛緼柩前死族人同棺葬之

牛氏生員馮三顧妻夫夭亡哭死而甦者三後墓莫哭歸家縊死

徐氏韓輝妻夫亡自刎不殊及夫葬後投繯死

以上舊志

張氏儒童吳宗煥妻十六而寡操行若潔始終不渝事曾祖姑及舅

姑以孝嫂亡撫姪如子俾克成立守節六十年雍正七年旌表

李氏高堞妻年二十寡守節五十二年貞烈賢孝雍正七年旌表

柴氏秦基顯妻雍正八年旌表

高氏唐來源妻年二十夫故一女俱無取從姪爲嗣孝養舅姑守節

六十載雍正十年旌表

黃氏郭玉振妻二十二而寡
方周歲孀姑年近八旬一家三口衣

食出十指茹藥飲水歷久不渝
孀居五十八年雍正十年旌表

呂氏高元善妻夫歿氏年二十一奉姑以孝撫前子以慈子亡撫孫

與孀媳苦守矢節四十一年雍正十二年旌表

秦氏郭畿甸妻早寡子殤以姪嗣守節四十年雍正十三年旌表

郭氏劉煥妻二十四寡無子爲夫立嗣乾隆元年旌表

以上見省志

靳氏許文浩妻二十四夫故遺腹生男舅姑年高仰事俯育艱苦萬

狀卒能教子大成成立宗族稱孝子守節四十九年乾隆元年

旌表

見邵府志

杜氏庠生趙宗德妻年二十一夫歿誓以身殉族黨苦勸乃止廷師

訓子篝燈課讀長子希義爲泮林翹楚次子希美亦稱善士守節

五十七年乾隆四年

旌表

見舊志

高氏王永瑞妻年十九寡守節四十餘年乾隆四年

旌表

見邵府志

張氏史雷妻年二十一寡子尚幼撫育成立乾隆五年

旌表

見續志

郭氏馮憲妻年十九夫亡舅姑衰老子尚幼仰事撫育勤苦備至孀

居六十七年壽八十四終乾隆五年

旌表

見邵府志

蘇氏連浩妻二十二夫亡孝舅姑撫遺孤乾隆七年

旌表

見省志

白氏高勤妻年二十四夫亡撫孤成立善事舅姑守節四十餘載乾

隆七年

旌表

孫氏馮胞妻年十九夫亡撫育嬰兒孝事舅姑守節三十六載乾隆

八年 旌表

吳氏蒲城縣丞劉墩妻早寡乾隆九年 旌表

以上見邵府志

亢氏王毓俊妻早寡子三歲有隣婦挑以再醮援刀自刎以救得免
事舅姑孝教子成立孀居四十七年乾隆九年 旌表

王氏范士楷妻二十一夫亡遺一子僅三月撫育成立事舅姑以孝
聞守節三十六載乾隆十二年 旌表

楊氏儒童連溥妻年十九溥亡無子爲夫立嗣守節四十餘載乾隆
十四年 旌表

葉氏高大定妻年二十六夫亡守節四十年乾隆十八年 旌表

許氏郭永昌妻早寡無子女誓死靡他以從姪其塏嗣撫育成立孝

事舅姑孀居六十載乾隆十八年 旌表

苟氏庠生馬辰妻年二十夫故一子甫四月堅志撫孤孀居五十載

乾隆十八年 旌表

高氏李旭妻二十二夫亡無子撫姪爲嗣躬勤紡織孀居六十四年

乾隆十九年

旌表

以上見邵府志

孫氏監生劉敬一妻年十九夫亡無子承嗣乏人貞操不渝歷二十

餘年始取姪本爲嗣撫育成立善事舅姑備極勤勞孀居五十二

載乾隆二十年 旌表

趙氏張曰良妻年二十夫亡無子承嗣乏人堅志守節以養舅姑歷

十餘年始以堂姪吏潔嗣撫養教誨入聲序孀居五十四載乾隆

二十一年 旌表

樊氏師宦姬妻拒暴自縊乾隆二十七年 旌表

以上見續省志

喬氏連敬路妻不為強暴所污自縊而死乾隆三十年 旌表

李氏馮性祿妻二十五夫亡子寅生尚懷抱撫育艱辛舅病刲股以進舅歿與孀姑相依為命曲盡婦道守節五十四載現年七十八乾隆四十年 旌表

高氏庠生劉如金繼室年二十五夫亡撫前室子掇取科名孝事衰舅繼姑不怠守節三十七年乾隆三十八年 旌表

劉氏監生劉際可繼妻節婦郭氏之媳也二十二而寡上奉孀姑下撫弱息孝慈兼盡乾隆三十八年 旌表

郭氏馮蘊誠妻二十一夫亡無子女以姪嵩生嗣孝事孀姑撫嗣子

如已出守節五十二載現年七十四乾隆四十年旌表

蔡氏監生高泰來妻年二十三夫亡遺腹子崇本撫養教誨備極艱

辛守節三十七年現年六十乾隆四十年旌表

以上建坊

趙氏庠生劉顯績妻年二十五夫故守節四十二年邑令旌

高氏王淋妻鎮江衛千總鎮邊媳年二十一夫亡無子女夫弟蕩其

家產旋與妻相繼歿子女俱幼氏撫如已出舅歿江南櫬歸典屋

營塋勤紡績以養姑恒數日不舉火而志益堅守節五十一年終

丁氏任文英妻二十三夫亡父欲奪其志氏堅不從父怒遂與之絕

守節三十四年邑令旌

馮氏劉廷震妻二十二夫亡一子未及周歲事舅姑撫遺孤苦節四十四年邑令旌

王氏監生秦捷妻二十二夫亡子鳳兆尚幼撫育成立入成均事舅姑孝謹有加邑令旌

氏沈棟妻年十九夫亡撫育遺孤矢志不渝子性曠卒妻賈氏年二十九三子皆幼與姑相依並勵貞操胡氏守節五十七年賈氏守節四十年雅撫軍旌

喬氏高克振妻二十三夫亡子周歲撫育成立守節五十一年終

王氏喬大士妻年二十三孀無子又無承繼身後始取從姪庠生喬琯爲嗣煢煢無依矢志不渝事繼姑以孝稱守節四十八年終

翟氏樊周幹妻二十二夫亡無子取姪梓爲嗣撫養教誨梓後食廩
于庠氏之力也守節六十三年終

靳氏秦沆妻年二十夫亡無子取姪祥兆爲嗣撫育教誨俾入庠守
節六十五年終學憲旌

馮氏儒童高翺妻二十六夫亡事舅姑撫遺孤備極勤瘁孀居四十
八載現年七十二

趙氏蔡銳妻二十三夫亡子甫數月撫育成立守節五十四年現年
七十七

楊氏庠生秦彬妻二十三夫亡一子尚在懷抱撫育辛勤守志不渝
孀居三十二年現年五十五

高氏監生馮其昌妻年二十五夫亡閱四月舉遺腹子金銘撫育入
成均事舅姑備極孝養歷久不懈守節四十三年現年六十七

楊氏高岱宗妻年二十夫亡無子復承繼乏人貞節自矢歷十餘年
取姪戚來嗣撫如已出守節四十二年現年六十一

王氏劉秀實妻二十四寡一子旋夭乳乳無依母舅勸令改適氏哭
誓遂與之絕家貧至爲人舂汲以糊口苦節四十六年現年七十
杜氏靳坤妻十九夫亡一子生甫數月事舅姑撫遺孤備歷艱辛守
節四十四年現年六十二公舉待旌

杜氏劉鳴臯妻二十六夫亡無子門戶單弱承繼無人取表姪李元
成爲後教誨成名守節三十九年現年六十四

高氏邵運昌妻年十八夫亡守節六十五年壽八十三卒

蔡氏董全妻二十一夫亡無子取姪文炳爲嗣孝以養姑慈以育子

守節五十二年公舉待旌

蔡相採訪

陳氏傅成功妻家赤貧每過親戚家遇甘旨輒不食必歸遺其姑初

舅病刲股以愈之姑病復刲股二次又嘗籲天減筭以益姑壽鄉

里咸稱其孝

張紹芳採訪

高氏辛酉舉人劉齊泗繼室年二十四夫亡無子取姪爲嗣撫育辛

勤事繼姑克盡婦道守節三十年現年五十四

劉齊法採訪

杜氏監生高勇側室十九勇卒守志撫孤其子泰來與其孫崇本俱

先後幼年病故氏率其媳蔡氏並孫媳白氏零丁孤苦共秉堅貞

人稱一門三節云蔡氏建坊

旌表

高特拔採訪

熊氏庠生劉如繪妻孝感福公女孫也姑邁疾危甚割股以進疾遂

痊人稱其孝焉

高岱採訪以上城內

張氏儒童趙淵妻姑卧病三月氏夫婦晝夜侍奉不辭勞瘁氏割股

奉姑病遂愈里閭傳爲異事

見中州彰善錄

高氏苗曰重妻孝事翁姑自甘淡薄鄰里稱其孝姑染病割股和藥

以進姑病旋愈

見中州彰善錄

張氏庠生秦恕妻十九于歸二十六而寡二子俱幼矢志不渝姑年

九十餘庶姑八十餘孝事甚篤教次子逢戊登乙酉賢書孀居三

十五年學憲旌

王氏密植妻十九適植甫三載夫故舅亦尋亡一子尚在懷抱家無一畝之殖紡績糟糠以養鄰里上其事于官康熙四十二年邑令吳公每月給米二斗復旌之

許氏顏聖宣妻二十二夫故子女俱無誓不改操事舅姑得其歡心嗣子尚幼撫養如已出孀居三十一年

王氏董士名妻年二十五夫亡子珩尚未週歲撫養成人娶妻胡氏閱七載珩復病故二子幼姑媳勵節教珩次子三辰早年入座

劉氏庠生張世臣妻十八于歸甫三月而寡爲夫立嗣守志不渝孀居五十四年現年七十二

唐氏儒童張元妻二十三夫亡守志二十九年現年五十一

陳氏儒童張會極妻二十五寡守志五十七年現年八十二

王氏儒童曹世德妻二十九守節壽九十歲終邑令旌

王氏儒童劉元福妻二十五寡紡織養子孀居三十一年

柳氏張士剛妻二十七夫亡守節三十三年現年六十七

周氏趙紹孔妻年二十四夫亡守節三十四年現年五十八

高氏監生連之長妻二十五夫故堅志守節現年七十二

秦氏連尚志妻二十四夫故矢志不渝現年七十

戴氏趙昭妻二十四夫故子方五月家人欲奪其志氏以死自誓事

舅姑撫弱子恪盡婦道孀居五十二載終

以上東郭保馮永祚王琳採訪

趙氏張鎬妻庠生趙湜栢女二十三而寡家貧無子紡績自給事舅

姑克盡孝道苦節五十載現年七十二

趙氏王淳妻二十四寡撫幼孤成立歷盡艱辛守節二十二年終

李氏王者儒妻十九夫亡子尚懷抱矢志不渝守節四十四年

劉氏庠生閻世澤妻年二十二寡撫孤成人邑令旌

趙氏顏淵妻夫亡年十九矢志靡他守節六十二年

秦氏儒童張鉞妻二十四夫亡子女俱無爲夫立嗣奉孀姑撫弱息
備極艱辛姑歿停柩在室適遭回祿之變氏撫棺哀號家具俱燼
而棺木略無毀傷人以爲孝感守節五十二年

張氏王在韓妻十九而寡子女俱無以姪嗣未幾殤父母欲奪其志
誓死不從姑病癱且失明與同寢處奉事惟謹守節三十一年

趙氏李意妻年二十三而寡爲夫立嗣守節三十一年現年五十四
柴氏張二黑妻年二十二夫亡現年五十五

宋氏王彥妻二十四寡現年五十五

邵氏王恭妻二十二寡撫子光宗成人光宗又以弱冠歿其妻劉氏
亦能承姑志守節不渝

趙氏王傳妻二十四守節現年五十九

唐氏王煌妻二十五守節現年五十六

楊氏王爾休妻二十孀無子女爲夫立嗣守志不渝現年五十一

周氏李永惠妻十九而寡志凜冰霜現年五十八

楊氏儒童田偵妻年喪夫矢志守節壽九十餘邑令旌

周氏監生張玉明妻年十八夫亡無子取堂姪丙寅爲嗣守節四十

一年現年五十九公舉待

旌以上東趙保
王琳採訪

高氏郭殷甸妻十九于歸甫三載夫故子女俱無舅姑慮其年少氏剪髮嚙指以矢旋取姪爲夫後嘗曰吾夫體弱故不壽遂名之曰健健長入庠皆氏訓誨力也守節六十一年終

黃氏郭光先妻二十五夫亡二子幼孀姑年七十餘患癱不能起氏竭力孝養撫二子俱克成立守節四十一年終

杜氏郭國材妻年二十六夫亡一子復早夭取姪海爲嗣恩勤撫養一如已出守節五十餘載現年七十八

趙氏庠生郭選甸妻二十三夫亡赤貧無子繼族姪誓守志不渝壽

八十二歲有妻劉氏亦早寡子取從姪汝甲爲嗣撫育成立姪姑年老竭力奉養鄰里咸稱其孝守節三十五載終

趙氏郊孫同妻十八子歸附五載夫亡無子取從姪爲夫後親操井臼以養舅姑撫育嗣子不啻己出守節四十二年終

吳氏申公輔妻十九子歸踰年夫亡子女俱無以姪有光爲嗣孀居守志奉養舅姑克盡婦道教嗣子有光弱冠入庠守節四十二載現年六十二

劉氏王拔妻二十五夫亡子甫三月矢志守節撫育遺孤孀居三十一年現年五十六

周氏張璫妻年二十一夫亡無子女取姪名標嗣堅志守節孀居三

十一年現年五十二

以上東陽保趙國
寧馮永祚採訪

白氏趙銘妻二十三寡子幼守志不渝歷四十八年學憲旌

劉氏趙廷松妻二十四寡子幼矢志不貳三十五載而卒邑令旌

白氏趙擢妻二十一寡姑老子幼孝慈兼盡孀居四十一載學憲旌

張氏趙景行妻二十二夫故子女俱無取姪爲嗣守節三十一年

孫氏趙君讓妻二十三夫亡一子甫七月孀姑年復衰邁家貧躬紡

紡織以供朝夕孀居五十三載學憲旌

高氏靳道魁妻二十五夫亡無子，元爲嗣勤儉持家教子應

元食廩于庠列明經皆母氏司，五十一年終

趙氏庠生岳鍾秀妻二十二夫亡，元爲嗣勤儉持家教子應

出守節三十三年

劉氏岳照福妻二十三寡子方三月下撫孤雛上事雙親茹茶飲水歷久不渝守節三十一年

白氏蘇釗妻早寡一子尚幼撫育成立守節五十餘年邑令旌

鄭氏高大士妻二十四夫亡二子俱幼氏矢志靡他撫養遺孤孝事舅姑勞瘁致疾年四十七歲終學憲旌

劉氏趙君聘妻二十而寡子永成甫三月家貧氏紡績自給事姑撫孤備極艱辛西隣火起延及氏翁姑藏主之室氏泣禱於神風反火熄主卒無恙人以爲孝感守節四十五年闔邑公舉待旌

柳氏趙樞妻二十七夫亡家徒四壁傭工族人以養其子艱苦備嘗

守志四十三年現年七十

劉氏趙景文妻早寡無子女以姪嗣守節四十五年現年七十四

白氏岳照祥妻二十二歲夫亡一子六歲殤取姪爲嗣年十八受室

復亡姑媳孀居共矢栢舟守節三十六年現年五十七

郭氏趙扶妻二十四夫亡無子取姪爲嗣家貧紡織爲生守節四十

年現年六十二

賈氏趙正妻早寡無子遺五女俱幼家貧晝夜紡績以養後五女俱

適人獨居窮苦守節三十三年現年六十

王氏武儉妻年二十三夫亡子未及周歲家赤貧朝夕紡織以養三

旬九食有人情所不能堪者守節三十二年現年五十六

蘇氏白雲程妻十八子歸甫三月夫故爲志堅守足未嘗踰戶外歷
八載始擇從姪廷選爲嗣撫養如已出事舅姑以孝聞舅歿與婦
姑相依爲命守節四十六年現年六十四

氏王業成妻二十一而寡一子尚懷抱時姑已亡惟舅在氏奉事
袁舅撫育孤兒復爲夫弟業遠完婚越數載舅與業遠相繼歿業
遠妻許氏年甫二十無子女妯娌二人共勵貞節三十餘年吳現
年五十八許現年五十四

張氏許承德妻二十一而寡時懷妊方三月遺腹生男撫育成立孀
居三十八載現年五十七

白氏趙宏倫妻早寡子煥方四歲稍舟矢志克孝克慈壽五十二卒

未及塋子煥又亡妻孫氏年二十四子女俱無矢志自守越八載
取堂姪嗣撫育如已出守節四十一年現年六十四學憲旌
靳氏趙貞妻二十六夫故子方周歲撫養遺孤孝事舅姑孀居三十
年現年五十六

許氏白佶妻二十六而寡守節三十五載現年六十一

楊氏趙焯妻十九于歸數月而寡守節三十一年現年五十一

以上
西陽

保馮永祥趙
國寧採訪

趙氏史端妻二十五夫亡矢志不渝孀居五十六年邑令旌

苗氏郭賢妻二十六而寡一子復歿並無旁支可嗣家赤貧紡績自
給毫無淪志壽八十終

胡氏高童妻有道妻年二十四夫亡守節五十一年學憲旌

王氏劉增妻二十二夫亡守節五十年

張氏敬銳妻年二十三夫亡無子取姪爲嗣孀居四十一年

王氏馬恭妻二十一夫亡無子取姪爲嗣二載而亡復取姪孫爲後
守節三十一年現年五十二

馮氏高承廕妻督運守備玉生子婦也二十六夫亡矢志堅守舅疾
割股以進孀居三十載現年六十六

李氏庠生周中矩妻早孀赤貧無子孀居三十載現年五十九

賈氏李崙妻年二十三夫亡子方三歲矢志守節撫育遺孤孀居四
十三年現年六十六

李氏秦荷妻二十四夫亡撫遺腹子成立姑老失明孝事不忘守節
四十二年現年六十七

董氏周則晉繼室二十七夫亡家貧弟勸其改適誓死不從撫前室
子卒克成立守節四十一年現年六十八

靳氏儒童周健妻二十三夫亡家貧無子守節四十五年現年六十

八
以上靳國保高
岳黃恩府採訪

李氏高哲妻年二十四夫亡子甫數月矢志守節撫養遺孤孀姑年
老多疾手足不能運動竭力奉事毫無懈怠孀居六十一年

劉氏高易妻早寡無子撫養他姑年二十七有現年六十六學憲旌
馬氏儒童高汝妻年二十二夫亡子超幼撫養遺孤入庠孀居三十

七年現年五十九

王氏高字早寘子承先尚幼撫育成立娶媳秦氏子旋亡無子秦
年二十八取姪懿修嗣始終共矢貞節王現年七十六秦年六十
王氏高字妻年二十一夫亡子甫數月家貧紡績自給矢無他志撫
育遺孤卒克成立孀居三十五年現年五十五

郭氏李國梓妻年十九夫亡矢志靡他遺腹獲男鞠育教誨俾克成
立孀居五十六年現年七十五

潘氏李志義妻二十七夫亡守節三十四年現年六十一

貝氏李克福妻十九夫亡家耐貧姑老而矢明兼患癰氏勤苦經營
孝養不怠孀居五十一年現年七十

李氏儒童許志敏妻舉人洵女孫年二十夫亡無子誓不渝操取姪
爲嗣撫育成立孀居四十一年現年六十一

白氏劉潤妻二十五寡守節五十三年現年七十九

以上平安保黃
思睿高代孫

時氏劉國英妻年二十二夫亡伶仃孤苦矢志靡他事孀姑孝養不
衰守節四十年

張氏趙元鐸妻二十七夫亡二子俱幼爲志堅守躬勤紡績積所贏
餘延師教子後二子次第入座孀居五十七年學冠旌

韓氏喬玉林繼室十九于歸甫十七日玉林病故誓不改操孝事舅
姑撫前妻子孝如己山陰居五十六年現年七十五歲授室旋亡
妻李氏亦能守志無愧其姑

高氏唐標妻年二十四夫亡栢舟矢志事孀姑撫藐孤紡織以易衣食備極艱辛孀居三十四年現年五十八

朱氏趙湊繼室十七于歸越六載夫亡上事孀姑克盡婦道撫前子如已出孀居三十四年現年五十六

唐氏趙希儒妻二十五寡子幼舅失明姑亦多病父母欲奪其志遂不歸寧孝慈兼盡艱苦備嘗後子亦亡矢志益堅寄居女家紡績自給孀居四十五年現年六十九

張氏儒童柳價妻二十四寡無子以姪繩祖嗣姪襁褓撫育備至姑患癱不能動履孝事彌篤守節三十三年現年五十八

喬氏唐信妻姑病數年不愈氏于歸甫月餘剖股以進沉痾頓起里

人咸稱其孝

以上小丁保劉齊法
黃思睿高岱採訪

石氏郇存信妻年十八夫亡一子甫彌月堅志守節撫育遺孤以綿
嗣續孀居八十年壽九十七終

趙氏張應科妻年十九夫亡子方周歲堅志守節孀居四十年

孫氏李秀妻早寡子幼貧苦守志孀居三十五年邑令旌

高氏馮梅妻十九夫亡子幼困苦守志孀居七十七年

唐氏毛坤厚妻年二十七寡撫幼子成立孝事舅姑不怠邑令旌

李氏劉洙妻二十六寡撫三幼子成立艱苦備歷守節四十四年

戴氏高塏妻二十一寡二子俱幼矢志不貳守節五十五年邑令旌

連氏毛澌妻二十四寡撫子守節四十二年現年六十四邑令旌

蔡氏毛沈妻二十二寡無子守節不渝三十八年現年六十邑令旌
邢氏董洵妻二十一夫亡無子以姪嗣姪夭取姪孫爲後守節四十

年現年六十一

以上西坊保高
岱黃思睿採訪

李氏李朝俊妻二十一夫亡守節三十七年現年五十八

李氏范崇先妻二十二夫亡守節三十六年現年五十八

王氏劉發祥妻二十二夫亡子親賢尚幼撫育成立孝事舅姑不怠
守節三十二年現年五十四公舉待旌

敬氏庠生吳璜繼室年二十七寡撫前室子國梁無異所生國梁娶

李氏未及期年病亡李年十九無子女取姪勲嗣與孀姑共勵冰

霜敬守節五十五年現年八十二李守節四十四年現年六十三

勲復早歿無子婦反氏年二十四誓無他志守節已二十年

金氏高思忠繼室年二十三夫亡時翁姑已歿太翁年八十餘氏奉養無缺前室遺一子撫如已出守節五十九年現年八十二曾元

濟濟五世一堂人以爲節孝之報

以上東坊保
反新浴採訪

李氏翟其福妻年二十五夫亡守節四十五年現年七十

高氏李克肅妻二十五夫亡無子取姪嗣視如已出事舅姑無懈志平居足不出戶外卽隣婦亦未嘗識其面也孀居三十五年

劉氏李克審妻二十一夫亡子方數月矢志靡他後其子數歲孀復取姪爲後節操益堅孀居五十六年終

陳氏常懷印妻早寡撫四歲孤成立事姑盡孝性好施親隣有貧乏

者多溫卹每夏施茶於道孀居五十三年現年八十邑令旌

李氏馬良臣妻二十歲夫亡守節三十一年

以上東王保張紹芳
馮嵩生蒲振邦採訪

安氏薛和妻二十四夫亡孝事舅姑撫育幼子始終不渝孀居四十

四年邑令旌

李氏馮宗禹妻十九子歸二十二孿生子女未五月夫亡母家憐其

年少家貧議改適氏聞之入室自縊以救免守節五十六年終

鄭氏張善世妻十六子歸越二載夫亡無子以姪嗣時舅姑已歿祖

姑尚在孝事無怠容撫嗣子如已出守節四十九年

高氏李布武妻二十三寡子珙方三歲勤苦鞠育越十五載娶媳馮

氏未幾珙復故馮年二十子僅四歲時有視孤寡爲奇貨者欲奪

其志賴姑媳同心協力雖危疑百端而之死靡他高守節五十七年馮守節五十八年

張氏庠生吳維新妻二十五夫亡一子僅四歲時舅姑俱歿祖姑年垂八旬氏撫育辛勤孝養無缺孀居六十一年

高氏李孝繼室十七于歸僅半載夫故舅姑憐其少氏以死誓堅志不渝撫前妻幼子如已出事舅姑克盡婦道守節三十七年

李氏庠生安其氣妻二十六寡遺二子長四歲次僅七月孀姑老家赤貧氏事姑撫孤備歷艱辛迄今姑壽九十三尚康健次子燮食餼爲名諸生皆氏孝養教誨之力也孀居四十四年現年七十

張氏韓坦妻二十三夫亡無子取姪爲嗣鞠育教誨不啻已出守節

五十年現年七十三

胡氏王曰琇妻二十二夫亡二子俱幼舅姑慮其少欲令改適剪髮

自矢誓不改操守節三十四年現年五十五

以上陽合保馮嵩生張紹芳蒲振邦採訪

鄭氏李璜妻年二十夫亡無子取姪爲後誓以死守守節三十三年

現年五十二

夏氏李惟忠妻二十一寡無子家赤貧乏承嗣其家欲令改適氏以

死誓取從姪爲嗣守節四十三年現年六十四

以上丁馬保蒲振邦採訪

劉氏劉鍾倫妻十九寡守志不嫁仰事俯育慈孝兼盡里人稱之

楊氏劉世澤妻十九寡子未週歲堅貞自矢事舅姑撫孤勤苦備歷

娶媳生三孫子婦相繼歿撫弱孫成立長孫婦復早逝遺子幼多

方保護撫孤三世人世所罕觀也守節六十八年現年八十七

馮氏馬宏義妻二十一寡孝姑撫子守節五十三年現年七十三

李氏常萬榮妻十九夫亡子尚在抱撫養成立守節三十七年

吳氏王振聲生母早寡守節四十一年現年六十五

司氏庠生劉義妻姑遭疾甚篤醫藥罔効氏割股以進疾尋愈

以上誠字

保張紹芳馮
嵩生採訪

史氏吳承先妻二十七夫亡守節四十七年現年七十四

吳氏劉登魁妻二十二夫亡守節五十年現年七十四

朱氏吳紹曾妻十八夫亡遺腹生子父令改適誓死不從孀居二十

餘年以完節終

白氏高煥妻二十五夫亡子甫四齡姑已前歿舅患癰症俛仰需人
氏仰承俛育備嘗辛苦守節六十三年

袁氏馮永傳妻二十夫亡無子以姪嗣守節五十三年現年七十三
杜氏馮淮妻二十二夫亡子尚幼撫育成立守節六十年

陳氏馮漢妻早寡無子以姪嗣守節五十二年壽八十二終

齊氏陳克行妻早寡無子以姪嗣守節五十二年現年八十二

孟氏陳世榮妻十八夫亡無子以姪嗣撫養教誨一如已出守節三
十五年現年五十三

李氏高敬宗妻二十三夫亡無子取姪爲嗣守節四十五年

馮氏吳燕桂妻二十七夫亡無子取姪爲嗣撫育一如已出事舅姑

以孝聞守節三十七年現年六十四

趙氏馮冕妻年二十八夫亡一子復夭苦節待繼現年五十六

翟氏高光綜妻二十二夫亡無子父欲令改適誓死不二取姪爲嗣
愛如己出孝事孀姑始終不衰守節六十四年

田氏馮燃妻二十三夫亡守節五十一年

丁氏張鴻祿妻二十夫亡守節五十一年

馮氏吳俊妻二十六夫亡無子取姪爲嗣姑目瞽氏負之行歷久不

懈守節三十五年現年六十一

杏氏李顯鳳妻早寡守節四十五年現年七十三

王氏李忠妻十八夫亡守節四十一年現年五十九

李氏馬思恭妻早寡守節五十五年現年八十四

馬氏馮際曠妻割股煮羹以愈舅疾人稱其孝

以上黃水保馮大興採訪

馬氏楊菖妻二十四夫亡子如椿娶妻李氏復旋歿姑媳堅貞自勵

馬卒年六十李卒年六十五俱完節終

馮氏楊沂妻二十七夫亡守節三十三年現年六十

常氏楊名顯妻早寡子蘊尚幼撫育成人娶妻李氏未幾蘊歿氏與

李撫孫如植爲娶馮氏如植又歿氏與李氏馮氏共勵冰操氏守

節六十年李氏馮氏各守節三十餘年學憲旌

張氏儒童楊洲妻夫亡守節四十一年現年六十六

王氏劉孝妻二十六夫亡守節五十一年現年六十一

張氏李四維妻早寡守節三十八年現年六十六

時氏張廉妻二十二夫亡守節六十三年壽八十五歲卒

吳氏楊暄妻二十六夫亡守節三十四年現年六十一

馮氏李賢妻早寡貧苦六十餘年現年九十

時氏楊世祿妻二十七夫亡守節五十餘年現年八十

聶氏陳泰妻十九夫亡守節三十二年現年五十一

郭氏陳璣妻二十夫亡守節四十年卒

李氏劉文煥妻二十二夫亡守節三十二年現年五十四

馬氏陳璉妻二十四夫亡以姪嗣守節四十七年現年七十一

王氏時和妻二十七夫亡無子守節三十五年現年六十二

常氏陳琳妻二十三夫亡無子守節三十六年學憲匾旌

楊氏周鑑妻早孀撫子文英娶媳楊氏文英復亡楊年二十二姑媳

共矢貞操姑守節五十年媳守節三十一年

以上南西保
馮大興採訪

常氏王文紹妻二十一夫亡無子守節三十七年現年五十八

韓氏郭鈞妻二十三寡無子以從姪亮采嗣鞠育教誨領辛卯鄉薦

姑患癱不能動履孝事無倦守節四十五年現年六十八

靳氏王大義妻二十五夫亡遺腹生男撫育成立守節五十二年

靳氏郭子道妻二十夫亡無子舅姑以其年少議改適氏以死誓以

姪嗣卒完節以終守節五十年

楊氏王延安妻早寡紡績度日守節五十二年現年七十七

王氏弓林妻二十二歲寡家無寸土孝事舅姑撫養孤子艱苦萬狀
守節四十四年現年六十六

陳氏王國忠妻二十一夫亡無子以姪嗣守節五十年學憲旌

孫氏庠生司如梁妻年二十九夫亡守節五十五年終

李氏裴耀妻二十五夫亡事舅姑撫遺孤孝慈兼盡守節七十年邑

令旌

以上師固保
馮大興採訪

陶氏張祥妻年三十夫亡一子尚幼貧無立錫母家欲令改適堅不
肯從將強遣之遂自縊死

連氏劉孔揚妻二十夫亡守節五十五年

申氏陶班之母十九生班而寡守節五十九年現年七十八

李氏劉國俊妻二十七夫亡守節三十年現年五十七

楊氏監生劉比朋妻二十五歲夫亡守節四十八年現年七十三

鄭氏劉聲顯妻二十于歸甫四月夫故以姪嗣守節五十五年現年

七十五

以上及新
浴採訪

友氏高起桂妻二十一于歸未及三月夫故守節十六年病終

李氏友友仁妻子歸甫三年夫亡無子取姪爲嗣撫如已出守節三

十餘年現年五十七

以上劉國
音採訪

史氏庠生陳琮妻二十一寡無子以姪嗣守節五十一年學憲旌

楊氏馬文標妻早寡三子俱幼撫育成立事繼姑盡孝後長子爾英

次子爾華相繼歿兩媳年各二十克繼姑志並勵貞操長媳常守

節三十六年現年五十六次媳史守節三十四年現年五十四

王氏馬爾蘇妻二十五寡子甫數月守節四十年現年六十六

崔氏李陶妻二十夫亡無子以姪嗣又復早亡與婦盧氏紡績自給
矢志不渝守節四十年現年六十

王氏李海妻二十二寡子幼矢志靡他刲股愈姑病守節三十一年
現年五十三

王氏孟永貞母二十三夫亡守節三十年現年五十三

苗氏盧鎬妻二十夫亡守節四十九年現年六十九

王氏馮國妻二十七夫亡守節五十年現年七十七

寇氏李開周妻二十六寡守節三十二年現年五十八

以上北西保
馮大興採訪

陳氏劉鉅妻二十夫故撫子培元甫娶復亡妻丁氏年二十一姑媳並勵貞操陳守節四十八年丁守節六十八年

申氏陶應拔妻二十一夫亡一子甫月餘堅貞自矢守節四十九年

現年七十一

以上黃水保
馮大興採訪

焦氏張令妻十九令亡無子以姪繼泰嗣家貧守志壽登九十終令弟式娶李氏式故無子氏年二十六與嫂焦相依誓不改適迨七十始取姪孫縉爲夫後令姪繼可娶唐氏甫期月繼可歿氏年二十以堂姪縉嗣守節三十八載壽五十八終

秦氏郭凝妻二十二夫亡無子以姪玉生嗣撫如已出守節四十一年現年六十三

王氏郭國珍妻二十夫亡子幼矢志不渝守節四十六年現年七十

四以上東陽保
馮永祚採訪

劉氏楊素蘊妻二十二寡貧苦守志歷五十八年終

蒲振邦採訪

劉氏監生吳方新妻早寡孝事祖姑及姑守志撫孤以壽終

蒲振邦採訪

